


ル 5
2537
3



門外子
號 2537
卷 20-3

日下舊聞卷二

形勝

燕東有朝鮮遼東北有林胡樓煩西有雲中九原南有滹沱易水民雖不佃作而足於棗栗此所謂天府者也

戰國策

燕亦勃碣之間一都會也南通齊趙東北邊上谷至遼

東北隣烏桓夫餘東結穢貉朝鮮真番之利史記

燕之涿薊富冠海內為天下名都鹽鐵論

燕郤背沙漠進臨易水西至君都東至於遼長蛇帶塞

險陸相乘也河圖括地象

富弼上仁宗封事云松亭關古北口居庸關為中原險要又河朔士卒精悍與他道不類得其心可以為用矣



其心則大可以為患安得不留意於此而輕視哉國朝
各臣奏議

冀都山脉從雲中發來前則黃河環繞泰山聳左為龍
華山聳右為虎嵩為前案淮南諸山為第二重案江南
五嶺諸山為第三重案故古今建都之地莫過於冀所
謂無風以散之有水以界之也朱子語類

南京戶口三十萬大內壯麗城北有市陸海百貨聚於
其中僧居佛寺冠於北方錦繡組綺精絕天下膏腴蔬
蕪果實稻粱之類靡不畢出而桑柘麻麥羊豕雉兔不
問可知石晉末割棄已前其中番漢雜鬪勝負不相當
既築城後遠望數十里間宛然如帶回環繚繞形勢雄
傑真用武之國也契丹志

李清臣議戎策云燕古為灑山多馬之國其土莽平宜
畜牧耕稼其民翹健便弓矢習騎射樂鬪輕死戰國時
為燕唐為范陽節度夫燕一國也范陽一鎮也以一國
之力獨立幾八百年遂與周室終始是其力足以扞邊
圉也范陽一鎮之地宿兵不滿數萬而奚契丹不能輒
苦趙魏滄景者其力足以制之也今以天下之力而不
勝其勞敝以天下之地而慄慄常為憂其故何也燕國
有朝鮮遼東雲字九原樓煩易水為之塞范陽有盧
龍古北松亭狐門之要以為之守用力少而塞之易此
其能以一國一鎮截然中立而不懼也自石晉割幽薊
檀順媯儒武應寰朔涿蔚賂戎以市天下而營平易亦
陷于契丹阻固扼塞我皆失之而割滄霸瓦橋信安安

日一有問
又二

肅廣信保定常山忻岢嵐火山寧化千里平廣之地以爲界戎馬馳突去來如股掌之上此天下之所以不勝勞敵而慄慄常爲憂也契丹之侵我易我守之益難故時平而屯戍之費不得息契丹之覘中國也近中園備契丹之處也多故力勞而勢益分間有憂國之將不過廣塘水而已使土在其外而爲沮洳于腹中闕河川泉瀆灌廬墓耕牧之地包七州廣數百里東起泥沽海口西達邊吳淀堆蒲藻魚蚌生之而粒食皆漕取于內地并西山尚缺百里曾未足限隔戎馬而邊民喪其業矣警之千金之家寇盜在藩牆之內不治格鬪攘却之具而方施塹闕下以爲守盜者從而笑之塘水是也

文選

聖宋

自雄州東際于海多積水契丹患之未嘗敢由此路入寇順安軍西至北平二百里地平廣無隔闕每由此入議者以爲宜度地形高下因水陸之便建阡陌浚溝洫益樹五稼以實邊廩而限戎馬雍熙後數用兵岐溝君子館敗衄之後河朔之民農桑失業多閑田且戍兵增倍端拱二年以左諫議大夫陳恕右諫議大夫樊知古等經官之恕密奏戍卒皆隋游仰食縣官一旦使冬被甲兵春執耒耜恐變生不測營田之議遂寢

文獻通考

知雄州何承矩上言兵家有三陣日月風雲天陣也山林水泉地陣也兵車士卒人陣也今用地陣而設險以水泉而設固建爲陂塘亘連滄海縱有突騎何懼奔衝今順安西至西山地雖數軍路纔百里卽有丘陵岡阜

亦多川瀆泉源倘因而廣之制為塘埭則可以戢寇騎
息邊患矣 太平治迹統類

契丹使劉六符謂賈昌朝曰塘灤何為者耶一葦可杭
投筆可平不然決其堤十萬土囊遂可得而路矣仁宗
以問王拱辰對曰兵事尚詭彼誠有謀不應以語敵此
六符夸言耳詎險守固先王不廢也 宋仁宗實錄

飛狐古北之口所謂險阻也幽燕割而險阻之地悉歸
于契丹今之所恃者不過塘灤耳自雄霸以達畿甸平
原易野健馬疾馳不半月可至一有不備可不為之寒
心哉 梁谿先生集

從滄州取海上路以數千艘出輕兵三萬趨平州入符
家砦口則咫尺燕薊矣 太平治迹統類

宋平燕北羣臣表賀有云舜肇十二州始別冀都之壤
周建八百國首疏名輿之封當天津析木之交實上谷
廣陽之勝形勢有金湯之險膏腴號陸海之饒 北盟會

尾箕之墟幽冀之區鬱鬱葱蔥屹乎皇都時以西山居
庸繚以涿易潞沽山川相繆古今不殊 吳禮部集

幽燕之地龍蟠虎踞形勢雄偉南控江淮北連朔漠駐
蹕之所非此不可 元史

至元四年正月城京師以為天下本右擁太行左注滄
海撫中原正南面枕居庸奠朔方峙萬歲山浚太液池
派玉泉通金水縈畿帶甸負山引河壯哉帝居擇此天
府 輟耕錄

元主中夏雖因其邇於陰山以定都而地形之強實甲天下撫據全盛幾將百年一時文章亦頗有奇氣未必非山川形勝風氣之觀感有以助之也誠意伯文集天下山川形勝雄偉壯麗可為京都者莫逾金陵至若地勢寬厚關塞險固總握中原之夷曠者又莫過燕薊雖云長安有崤函之固洛邑為天地之中要之帝王都會為億萬年太平悠久之基莫金陵燕薊若也楊文敏

公集

范鎮之賦幽州也曰繩直砥平形勝爽塏木華黎之傳幽燕也曰虎踞龍盤形勢雄偉以今考之是邦之地左環滄海右擁太行北枕居庸南襟河濟形勝甲於天下誠天府之國也究其沿革唐虞則為幽都夏殷皆入冀

地周封堯後於薊封召公於燕正此地也厥後漢曰廣陽晉曰范陽宋曰燕山元曰大興國朝初謂之北平而為燕府龍潛之地尋建為北京而謂之順天焉博物策

京師形勝甲天下展山帶海有金湯之固明輿地指掌

京師負重山面平陸地饒魚鹽穀馬果窳之利又轉東南之粟財貨駢集天險地利足制諸邊汴洛關中江左皆不及也吾學編

北京雖號稍東北南與餉遠然左滄海右太行風氣敦厚長安之下此其最也鳳洲筆記

洪武初營汴為北京則亦周公意也未年東宮營秦則

亦婁敬張良藝祖意也而卒不果豈天將以待燕耶成祖之營燕也當時臺諫交口不便主事蕭儀言之尤峻豈未識上意所屬耶成祖曰北平之遷吾與大臣密計數月而後行彼書生之見豈足以達英雄之畧哉續衣生集

張良關中用武之地阻三面而守一面東制諸侯今世都燕亦用武之地亦阻三面以一面制天下前之進無窮後之退有限大非關中之比方輿勝畧

京東負山控海負山則泉深而土澤控海則水淤而壤沃諸州邑泉從地湧一決而通水與田平一而至於如密雲縣之燕樂莊平谷縣之水峪寺龍家務三河縣之唐會莊順慶屯地薊州城則有黃厓營城西則有

白馬泉鎮國莊城東則有馬伸橋夾林河而下河南則有別山舖及夾陰流河而下至於陰流淀疏渠皆田也遵化四南平安城夾運河而下及沙河舖地方又鐵廠湧珠湖以下至韭菜溝上素河下素河百餘里夾河皆可成田豐潤縣南則大寨乃刺榆坨史家河大王莊之地東則榛子鎮西則鴉洪橋夾河五十餘里皆可成田玉田縣青莊塢導河可田後湖莊疏河可田三里屯及大泉小泉引泉可田至於瀕海自水道沽關黑巖子墩起至開平衛南宋家營之地東西度之百餘里南北度之百八十里皆隸豐潤其地自吳越瀕海之沃區相等昔虞文靖公之議東極遼海南濱青徐瀕海皆可成田之地今豐潤實其中境欲舉其議行之茲非其先當致力者

乎蓋先之京東數處而畿內列郡皆可漸而行也先之畿內而西北之地皆可漸而行也在邊陲則先之薊鎮而諸鎮皆可漸而行也至於瀕海則先之豐潤而遼海以東青徐以南皆可漸而行也

路水客譚

燕山建都自古未嘗有此議也豈以其地逼近邊塞耶自今觀之居庸障其前河濟襟其左山海扼其左紫荆控其右雄山高峙流河如帶誠天造地設以待我國家者且京師建極如人之元首然後須枕藉而前須縣遠自燕而南直抵徐淮沃野千里齊魯為肩吳楚為腹閩廣為足浙海東環演蜀西抱真所謂扼天下之吭而拊其背者也且其氣勢之雄大規模之弘遠視建康偏安之地固已天淵矣

五雜俎

今國家燕都可謂百二山河天府之國但其間有少不便者漕粟仰給東南爾運河自江而淮自淮而黃自黃而汶自汶而衛盈盈衣帶不絕如綫河流一涸則西北之腹盡枵矣元時亦輸粟以供上都其後兼之海運然嘗群雄干命之時烽烟四起運道梗絕惟有束手就困此京師之第一當慮者也

同上

國家建都幽朔毋論山川時濯險甲寰區而紫荆扼蜚狐之吭居庸拊上谷之背山海掣元菟之肘其因地利而盡人謀可謂千古石畫

長安客話

漢唐都關中去邊幾千餘里今京師北抵居庸東北抵古北口西南抵紫荆關近者百里遠不過三百里爾

漢唐宋皆並建兩京漢唐以長安爲西京洛陽爲東京
宋以汴爲東京洛爲西京其地皆相去不遠高皇帝定
鼎金陵文皇帝遷都金臺則跨江河南北而各爲一大
都會蓋天下財賦出於東南而金陵爲其會戎馬盛於
西北而金臺爲其樞並建兩京用東南之財賦會西北
之戎馬無敵於天下矣 圖書編

京師形勝以堪輿家論之玉河之水當直出會南海子
從天地壇前轉東入潞河方爲自然崇文門外開河宜
塞之庶幾左臂不斷此乃帝王建都萬代之計也 梓谿集

北京可龍水爲白河出密雲南流至通州城白虎水爲
玉河出玉泉山經大內出都城注通惠河與白河合朱

雀水爲盧溝河出大同桑乾入宛平界出盧溝橋元武
水爲濕餘高梁黃花鎮川榆河俱繞京師之北而東與
白河合 蓬窗日錄

太行自西來演迤而北繇巨魏晉燕趙之境東極於醫
無間重岡疊阜擁護而圍繞之不知其幾千里也其東
則汪洋大海稍北乃古碣石稍南則九河故道浴日月
而浸乾坤所以界之者又如此其直截而廣大也况居
直北之地上應天垣之紫微其對面之案以地勢度之
則泰岱萬山之宗正當其前大天之象以北爲極則地
之勢亦當以北爲極易曰艮者東北之卦也萬物之所
成終而成始也離艸物皆相見南方之卦也聖人南面
而聽天下嚮明而治孔子曰爲政以德譬如北辰居其

所而衆星共之今之京師居乎良位成始成終之地介乎震坎之間出乎震而勞乎坎以受萬物之所歸體乎北極之尊嚮乎離明之光使萬物之廣億兆之多莫不面焉以相見則凡舟車所至人力所通者莫不在於照臨之下自古建都之地土得天時下得地勢中得人心未有過此者也 大學衍義補

京師前挹九河後拱萬山正中表宅水隨籠下自辛而庚環注皇城繞巽而出天造地設 湧幢小品

京師展山帶海有金湯之固真定以北至於永平關口不下百十而居庸紫荆山海喜峯口占北口黃花鎮險阨尤著 職方圖考

北京土應北辰以象天極南面而聽天下天險地利曰

於關中 治平器

楊雄幽州牧箴蕩蕩平川惟冀之別北阨幽都戎夏交偪伊昔唐虞實爲平陸周末荐臻迫於獯鬻晉溺其陪周使不徂六國擅權燕趙本都東限穢貊美及東胡強秦北排蒙口域臨大漢初定介狄之荒元戎屢征如風之騰義兵涉漠假我邊萌既定且康復古虞唐盛不可不圖衰不可或忘隄潰蟻穴器漏鍼芒牧臣司幽敢告侍旁 藝文類聚

李時勉北京賦惟皇明之受天命也我太祖皇帝首仗義師以平暴亂豪傑景從聲振江漢削除僭竊拯民塗炭定鼎金陵撫綏萬邦乃睠茲土實雄朔方倣成周之卜洛欲並建而未遑逮我聖子繼明重光握

乾御極一遵舊章。仁聲洋溢乎遐邇。恩澤汪濊于八荒。既致治于太平。遵臯衢以省方。仰先志之未遂。度弘規以作京。堯經營之伊始。徧夸。夏其權騰。曰惟北都。在冀之域。右挾太行。左據碣石。背疊險。今重關。面平原。今廣澤。宗恒嶽其巍巍。鎮鑿閭而奕奕。冠九州之形勝。實爲天府之國。是以軒轅邑之以分州。唐堯階之以爲帝。擴神化以宜民。大勲德之光被。鬱王氣之所鍾。于今茲而有待也。於是仰瞻析木。俯測地靈。龜筮兆吉。天人叶應。神祇獻珍。而山石自出。河嶽效順。而神木自行。民子來兮。相續期不日。而成功。爾乃懸水樹泉。識景表營。方位既正。高下既平。群力畢舉。百工並興。建不拔之丕址。拓萬雉之金城。引天泉于西阜。環湯池而鏡清。九衢百廛。之通達。連甍邃宇。之縱橫。頽壯麗其若此。非燕逸而娛情。蓋所以強幹而弱枝。若重以御輕。展臯儀而朝諸侯。遵先規而布仁政者也。若乃四郊砥平。臯道正直。視萬國之環拱。適居中而建極。其南則萬流宗海。平林蔽天。攬邯鄲鉅鹿之廣衍。馳平疇沃野之綿延。滄淤恒衛。經其野。濡磁涑桑。滙其前。界以大陸廣阿之弘壤。扼以大茂井陘之連山。包絡趙衛。襟帶齊魯。膏腴之地。綿亘三千餘里。而極於黃河伊潁之川。其水陸之所產。阜犇繁盛。蓋莫得而計焉。其址則疊嶂嶺。層巒蔽虧。長城矗乎雲表。百泉湧乎山隈。壯天關而設險。守一夫而莫開。偉左盤而右顧。宛鳳舞而龍飛。實磅礴而鬱積。

粵擁衛于邦畿。包狼山上谷之阻。據野狐獨石之危。掩祖山木葉之離。立連白登紫塞之逶迤。控女直而極乎洮河之北。鎮朔漠而逾乎瀚海之湄。其東則潞河通漕。控引江淮。肥如灤涿。灌注縈迴。連峯片石之隘。首陽崆峒之崖。固已遐哉邈乎。而莫不在乎綏懷。環以大海。衆水所歸。洪濤巨浪。洶湧崔嵬。蓋不知其幾千萬里。而蠻商番舶。帆檣隱天。上下不絕。而往來又有迷瀛方壺。鳳麟聚窟。十洲三島。靈異非一流。精之闕。瓊華之室。墉城岩巖。金臺岑嶽。紫氣丹青。景雲矚日。靈固偃俗。安期姜門之倫。相與從遊於其間。出入隱見。而恍惚瞻帝京。其伊邇庶可見其騖鸞駕鶴之髣髴。其西則崇山鬱翠。高挹秦岱。北接居庸。南首

河內。奇峯擁關。龍門阻隘。玉泉垂虹。青烟浮黛。上截臬兮倚空。下蟠據而際海。其麓則有渾河湯湯。西湖泱泱。鹽溝琉璃。桑乾廣陽。雪波泛湧。灑蒸汪洋。一瀉千里。會流帝鄉。又有上林禁苑。種植畜牧。連郊踰畿。緣丘彌谷。澤潞川滙。若大湖瀛海。渺瀰而相屬。其中則有奇花珍果。嘉樹甘木。禽獸魚鼈。豐殖繁育。彪彪籍籍。不可得而盡錄。固可以因農隙而校田獵。選車徒以講武事。乃遵國風。稽王制。詔期門。簡將帥。乘玉輅。擁翠蓋。出天關。而雷轟轆芳郊。而雲會。非所以威戎誇狄。娛樂騁意。蓋將取不雉而除菑害。狩無擇而順殺氣。謹大易之用於三驅之時。驗騶虞之仁於一發之際。水衡虞人之容與。武夫壯士之奮厲。皆知夫

仁者之爲勇。而以投石超距之足鄙。亦何必殄夷禽獸。割鮮野食。而以俯仰極樂之爲貴也。若夫其宮室之制。則損益乎黃帝合宮之宜。式遵乎太祖貽謀之良。居高以臨下。背陰而面陽。奉天凌霄以磊砢。謹身鎮極而崢嶸。華蓋穹崇以造天。儼特處乎中央。上傲象夫天體之圓。下效法乎坤德之方。兩觀對峙以嶽立。五門高矗乎昊蒼。飛閣帆以奠乎四表。瓊樓嵬以立於兩旁。廟社並列。左右相當。東崇文華。重國家之大本。西翊武英。嚴齋居而存誠。彤庭玉砌。璧檻華廊。飛簷下啄。叢英高驤。闕闕其蕩蕩。儼帝居于將將。玉戶燦華星之爛晃。璇題納明月而輝煌。寶珠焜耀于天闕。金龍夭矯于虹梁。藻井煥發。綺窗玲瓏。建瓴

聯絡。複道迴術。軼霄漢以上出。俯日月而盈胸。五采炫映。金碧晶熒。浮輝揚耀。霞彩雲紅。其後則奉先之殿。仁壽之宮。乾清坤寧。眇麗穹窿。掖庭椒房。闔闔閼通。其前則郊建圓丘。合祭天地。山川壇壝。恭肅明祀。至於五軍庶府之司。六卿百僚之位。嚴署宇之齋設。比館舍而並置。列大明之東西。割文武而制異。至於京尹赤縣之治所。王侯貴戚之邸第。辟離成均。育賢之地。守羽林而掌飲飛者。至九十而有四衛。莫不井列而碁布。各雄壯而偉麗。其巖廊之上。則有臯夔稷契之倫。元凱俊乂之輩。相與賡虞廷之歌。談羲農之際。罄補袞之能。懷忠貞之志。考禮文于大備。贊聲樂之盡美。是以朝無缺政。德教漸暨。薄海內外。均陶至

洽幸其有作。聿來趨事。成此大功。忘其劬勩。人和既
極。休徵滋至。慶雲瑞靄之覆于闕庭。素鳥玄兔之獻
于丹陛。醴泉屢出。甘露數墜。麒麟騶虞之珍。馴獅天
馬之類。紛紜雜遝。莫能殫記。于以見天眷之益隆。而
聖德之純備者也。於是正月上日。工既訖。爰告成
于天地。肆紹美于祖宗。清心凝慮。齋沐肅雍。粢盛既
潔。牲牷既豐。芬郁郁以旁達。靈續續其來降。錫嘉貺
之穰穰。介景福于帝躬。將順應于昌期。趾盛美于無
窮。乃服袞冕。御帝座。開九重之深宮。受萬邦之朝賀。
內侯甸而要荒。外殊方而異俗。胥近悅而遠來。紛鼓
舞而匍匐。方物溢以克庭。粢絢燦而駭矚。率蹈舞于
階墀。效華封之三祝。爾乃浹和會。昭景鑠。鏗鯨鐘。奏

雅樂。詔光祿以開筵。合百辟而燕樂。饌珍玉兮芳馨。
疊瓊漿以斟酌。聯貂蟬兮夾陛。雜蠻夷之荒服。莫不
酣暢而飽德。咸頌歌而踴躍。越填城而溢郭。藹歡聲
于寥廓。斯可以婉太古之無爲。慶華胥而蹈栗陸。顧
皇上之謙抑。視至治爲未足。於是降德音。播嘉惠。省
刑罰。薄賦稅。汰冗濶。旌廉吏。舉賢才。擢俊乂。發倉廩。
賑貧匱。尊高年。而禮有德。慎防禦。而修武備。貴爵重
賞。以厲廉耻。厚往薄來。以馭四裔。蓋欲使人知所本。
士知所勵。四方萬國。無一民之失所。窮陬僻壤。無一
物之不遂。舉陶于春風和煦之中。而樂于雍熙泰和
之治。此蓋堯舜兢業之心。文王敬止之意。所以紹鴻
業。繼先志。益宏遠。而有偉。故不勞而甚易。冠絕乎前

古垂休於後世固可必聖子之與神孫益昌盛而無
替小臣微陋忝職文字願賦帝都之盛槩揚國美於
萬彙復爲之歌曰煌煌帝都今逾鎬豐阻山帶河兮
壯以雄天開日明今王氣所鍾穹窿造天兮惟帝之
宮廓氛祲兮開演漾鎮夷夏兮宣皇風王道平平兮
四方來同願皇圖之鞏固歷萬世兮無窮古廉集
金幼孜皇都大一統賦洪惟天朝太祖高皇帝誕膺
景命龍飛淮甸既渡大江遂都金陵撫有區夏肇造
洪基以開萬世太平之業逮我皇上繼承大統克紹
丕圖仁恩誕敷聲教洋溢雨暘應期民物阜蕃溥海
內外罔不率從而自蒞昨以來宵旰拳拳惟思所以
繼志述事以承太祖高皇帝之意於是倣古制肇建

兩京以爲北京實當天下之中陰陽所和寒暑弗爽
四方貢賦道里適均且沃壤千里水有九河滄溟之
雄山有太行居庸之固玉泉之流經緯乎禁籞之中
碣石之壯盤踞乎畿甸之內故其山川之壯觀風氣
之清淑真有以卓冠四方爲萬國之都會誠帝王子
孫萬萬世太平悠久之基由是勅冬官涓內外文武
百執事經營於茲而凡民庶士卒工匠之流莫不駿
奔子來趨事赴工罔敢或後遂至天意人心感孚和
同靈應疊臻嘉祥屢薦不數年間厥功告成而宮闕
府庫之宏壯郊廟社稷之嚴肅朝市民物之鉅麗秩
乎其有序井乎其具列蓋自古先帝王都邑之盛未
有逾于此者乃永樂辛丑春正月朔旦皇上御奉天

殿大朝。海內文武群臣。四方蠻夷酋長。率皆在庭。踴躍鼓舞。以爲皇都之奇麗。若此。誠曠古所未見。而未
有者。而所以爲皇上萬壽之徵。宗社磐石之固。聖子
神孫寶祚綿延之慶。皆兆于此矣。何其盛哉。臣幼居
禁苑。職業文詞。幸際昌期。躬觀盛美。謹鋪張爲賦。以
彰太平之偉烈。且以昭示於無窮。其辭曰。維太祖之
受命。膺上天之禎符。奮布衣於淮右。提一劍而長驅。
乃剪夷丁群醜。悉蕩滌于寰區。旣渡大江。金陵是都。
虎踞龍蟠。興王之居。爰啟鴻業。肇開皇圖。振光華于
曠古。恢萬世于弘模。繫我聖皇。祇膺寶曆。奉天勤民。
太祖是式。恩覃九圍。仁周八極。雨暘應期。民物豐植。
觀四方之清寧。乃有念于京邑。維此北京。太祖所屬。

天造地設。靈鍾秀毓。總交會于陰陽。盡灌輸于海陸。
南臨鉅野。東瞰滄溟。西有太行之巖嶽。北有居庸之
崢嶸。瀉玉泉之透迤。貫金河而廻縈。瓊島上聳以盤
礴。太液下澈而泓澄。將繼志而述事。必於此而經營。
乃勅群工。乃命百職。萬方子來。効勤殫力。萃四海之
良材。伐南山之鉅石。感恩意之昭孚。戒經營而弗
於。是天心協順。靈應彌彰。布輪囷之卿雲。發璀璨之
祥光。醴泉湧其浩浩。甘露下其瀼瀼。赫萬靈之呵護。
藹瑞氣于穹蒼。乃卜良辰。乃蠲吉日。以相以度。以構
宮室。棟宇崇崇。簷楹秩秩。以蓋以覆。陶冶埏埴。以繪
以圖。黝堊丹漆。煥五采之輝煌。作九重之嚴密。天地
洞開。馳道相連。金鋪絢日。玉柱凌烟。星羅碁列。璧瓌

珠聯虹飛霞擁。龍翔鳳騫。超凌氛埃。壯觀宇宙。規模
恢廓。次第畢就。奉天屹乎其前。謹身儼乎其後。惟華
蓋之在中。竦摩空之偉構。文華翼其在左。武英峙其
在右。乾清並耀于坤寧。大善齊輝於仁壽。豁千門之
雲。轟敞萬戶之幅。湊至若丹闕巍巍。飛觀凌空。觚稜
上聳。閣道遙通。左祖右社。蔚乎穹窿。有壇有壝。有寢
有宮。亦有天地。以嚴其崇。復有石渠天祿。以蓄圖書。
玲瓏綺錢。照耀文疏。懸牙籤之萬軸。列綉帙之紛如。
宛奎壁之宵映。粲藜燈之夜嘯。瀛洲文學之士。閨苑
列仙之儒。備顧問於朝夕。咸欽仰於聖謨。又若大庖
光祿。列乎西東。珍羞駢羅。玉食惟豐。禁城之下。金水
溶溶。畫棟凌雲。繡柱含空。璇題耀日。綵橋駕虹。雕甍

隱映寶殿玲瓏。太孫所居。諸王之宮。金枝玉葉。照耀
層空。育德講學。宴適游從。若夫御苑逶迤。上林深窈。
有山有泉。爲臺爲沼。巖谷谿澗。雲霞縈繞。走有奇獸。
飛有靈鳥。樂寬閒以棲息。恣回翔以馴擾。復有天閑
十二。駿骨軒昂。渥洼神龍之種。大宛名駒之良。並權
奇而雄傑。或磊落而騰驤。又若廩庾輪囷。惟萬惟億。
豐歲所儲。累世之積。玉粒金秬。露積克溢。國用所資。
人足家給。復有武庫巍峩。戈矛森列。旗幟搖雲。鎧甲
耀雪。凜凜白旄。差差黃鉞。四征不庭。以彰九伐。奮軍
聲之揚揚。振皇威之赫赫。又若內帑克初。寶藏紆餘。
奇珍異產。海匯河輸。夜光之璧。明月之珠。琉璃翡翠。
瑪瑙珊瑚。璋璣琥珀。火齊璠璵。錦繡迤邐。羅綺芬敷。

又若百司庶府有綱有目文武頡頏爲國鈞軸太學
郡庠之並建琳宮梵宇之森矗列九衢之坦坦引六
街而相續閭閻櫛比闐闐雲簇鱗鱗其瓦盤盤其屋
馬馳聯轡車行擊轂紛紜並驅雜遝相逐富商巨賈
道路相屬有貨填委丘積山蓄又若歌樓舞榭艷態
穠粧羅袖回雪清聲遶梁管絃嘔啞狎坐傳觴娛青
陽之變景駐白日之飛光維小大之不遺仰制度之
畢備斯皆聖智之籌謀實出宸衷之經緯儼氣象之
一新壯規模於萬世屹鴻基之豐隆偉山河之巨麗
貽子孫以嘉猷紹先皇之初志邁豐鎬之舊規軼漢
唐之遺制於是厥功告成慶叶天人乃歲辛丑維孟
之春王正之月朔旦良辰聖皇臨御大朝群臣內外

文武濟濟彬彬戎狄蠻貊工商士民稽首嵩呼抃舞
歡欣筐篚具列方物畢陳以饗以饋洽此皇仁大一
統而無外藹至和於八垠臣忝詞垣叨職文字懷眷
寵之彌深愧涓埃之無補際千載之良逢幸微生之
快覩傳盛事於將來奚往牒之足數祝聖壽於萬年
播皇猷于千古

金文靖公集

揚榮皇都大一統賦維皇明之有天下也於赫太祖
受命而興龍飛淮甸風雲依乘恢拓四方弗遑經營
旣渡江左乃都金陵金陵之都王氣所鍾石城虎踞
之險鍾山龍盤之雄偉長江之天塹勢百折而流東
瀾後湖之環遶湛寶鏡之涵空狀江南之佳麗滙萬
國之朝宗此其大畧也迨于聖皇嗣大一統剛健日

新聰明天縱。囿四海以爲家。登群賢而致用。思繼志之所先。惟都邑之爲重。於是天意鑒觀。人心和同。神靈効順。龜筮協從。旣應天以順時。爰辨方而正位。視往聖而獨超。繼高皇之先志。乃相乃度。載經載營。眷茲北京。山川炳靈。其爲形勢也。西接太行。東臨碣石。鉅野亘其南。居庸控其北。勢拔地以崢嶸。氣摩空而崩劣。復有玉泉漫流。宛若垂虹。金河澄波。雪練涵空。膏渟黛蓄。浩渺冲融。包絡經緯。混混無窮。貫天河而爲一。與瀛海其相通。爾其派連析津。源分潞水。旣環抱以縈迴。亦瀰茫而清泚。來職貢於四方。通檣帆於萬里。至若王畿之內。輦轂之間。沃野彌望。原陸寬閒。烟火相接。鷄犬相聞。宵無警柝。外戶不關。以牧則蕃。以種則獲。以佃以漁。以耕以鑿。隨其所營。皆得其樂。而其爲都也。四方道里之適均。萬國朝覲之所同。梯航玉帛。爲都邑之會。陰陽風雨。當天地之中。爰勅臣庶。爰伐材木。南浮湖湘。西入巴蜀。斧披虹霓。聲撼山谷。徂徠之儲。新甫之蓄。榷楠杞梓。杉櫛檉楠。梢橫青天。根連地軸。鉅細畢輸。長短悉錄。駕雲車之百輛。振龍驤之萬斛。紛紜輻奏。彌布川陸。厥材之良。不一而足。若乃美石比玉。從古所稱。瑩者如圭。紫者如瓊。溫者若璐。潤者若瑛。以磨以礪。乃堅乃貞。鏗林振壑。馳騰驚霆。千夫所攻。萬里啟行。山靈助其光華。坤后發其精英。豈砥砭之敢混。實寶玉之爭呈。若夫坎離播功。坤艮合德。出於陶冶。成于埏埴。飛紫燄於半空。結

祥烟于八極。或規以圓。或矩以方。粲琉璃之一色。耀
文采于中央。或肖形于獸吻。或擬質于鴛鴦。於是良
時載啟。吉旦既卜。臣庶駿奔。滃若雲蠹。源源其來。登
登其築。百堵皆興。萬夫相屬。行若魚貫。立若鱗蹙。斧
斤揮霍。尺度攢簇。由是賁育効力。公輸獻奇。日受日
斯。伯與暨倕。攄厥巧思。運厥神機。各効其能。以見於
爲。顧小善之並錄。矧妙伎之或遺。群材礪磊。以山積
鉅棟騰躍。而翬飛。爾乃九門洞開。三殿攸建。觚稜雲
聳。丹漆霞絢。輦路逶迤。閣道迴轉。華蓋屹立于中央。
奉天端拱。乎南面。其北則有坤寧之域。乾清之宮。璇
題耀日。寶柱凌空。金鋪璀璨。綺疏玲瓏。珠玉炫爛。錦
繡丰茸。葳蕤起鳳。天矯盤龍。千門瑞靄。萬戶春融。其
南則有午門。端門。左掖。右掖。丹闕峙而上聳。黃道正
而下直。豁大明之高張。屹正陽之拱挹。繚周廬之穹
崇。蔽重甍之護翼。其左則有宗廟之祀。以奉祖考。仰
在天之神靈。隆萬古之尊號。謹歲時之烝嘗。薦純誠
于蘋藻。其右則有社稷之靈。以崇祀享。汎壇壝之肅
清。通神祇于盼蛩。爰春祈而秋報。用昭答于靈貺。若
夫乾清之前。門列先後。日精月華之對峙。景運隆宗
之並構。謹身翼乎其前。仁壽屹乎其右。又有奉先之
祠。大善之殿。文樓武樓之特聳。左順右順之並建。若
乃震位毓德。文華穹窿。亦有武英。實爲齋宮。有天財
寶藏。以貯珍貨。有大烹光祿。以典殮饗。寶善在左。以
翼翼。思善居右。而崇崇。若夫欽安之後。珠宮貝闕。藻

繡交耀。雕橿截。六宮備陳。七所在列。親蠶有館。繅
絲有室。二南詠歌。播于篇什。輔德相承。風化洋溢。皇
城之外。殿宇魁渠。有翼有嚴。太孫之居。金水之濱。瑤
階玉除。梁棟巍巍。上凌太虛。為諸王宮。翊衛皇圖。星
羅碁布。以臨九衢。至若文淵之閣。秘書之府。纂述乎
今。儲蓄乎古。汗牛充棟。莫知其數。牙籤迤邐。細帙旁
午。粲金壁之上。連赫虹霓之夜。吐若夫飛閣峩峩。寶
為承天。繡楹霧簇。畫拱星聯。踞石狔之盤礴。竦華表
之巋然。至若南郊之設。特超古制。圜丘方丘。不岐以
二。合祀于中。父母天地。壇分內外。二十有四。群祀有
典。百神有位。惟我太祖。實配上帝。乃歲孟春。三陽之
始。吉日斯蠲。祀事有備。薦以粢盛。泛以醴齊。豆邊陲

秩。庭燎晰晰。鼓鐘戒嚴。鑾輿至止。儼對越以升中。祝
蕃禱之攸萃。至若山川有壇。先農有祀。馬祖旗纛。各
以時祭。寅畏恪恭。罔有弗至。若夫稽古建官。為民之
牧。內外相承。各率其屬。至若黃門給事。青瑣仙班。典
內廷之封駁。近咫尺之天顏。復有文翰之林。詞藝之
苑。處嚴密之清禁。列英華之妙選。優游玉堂之署。出
入金鑾之殿。擅瀛洲之美譽。承黼袞之清問。至若鳳
池之職。尚寶之司。掌絲綸于紫誥。典符璽于彤闈。有
宗人以統天潢之派。有銀臺以通喉舌之機。若乃六
卿分職。位躋台鼎。贊廟堂之謀謨。總藩方之政令。至
若憲臺之任。風紀是司。誠耳目之所寄。實恣度之攸
施。若夫都府有五。軍政是宣。奮貔貅之將士。耀霜

之戈鋌保圖輿於按堵掃絕漢之烽烟至若都邑有
 庠辟雍有學育才於茲以儲以擢若夫容臺典祀士
 師明刑錦衣總夫儀衛巡警係于五城鴻臚謹朝謁
 之禮太僕司監牧之名京畿布列于州郡田野參錯
 于屯營至若奉神有祠報功有廟梵宇琳宮光輝朗
 耀倉廩之積如坻如京露積紅粟陳陳相因鎧甲晶
 熒士卒精銳靡強弗摧靡堅弗碎驂駟騏驎駿褭驪
 驪宛蕪之駿渥注之良克乎內廐磊落騰驤又有福
 山後峙秀出雲烟實為主星聖壽萬年層嶂疊擁奇
 峯相連鼓鐘有樓其高接天勢若貫珠萬里綿延若
 乃朝市既成井邑斯列問閭輻湊闔闔有截豁九達
 之通衢羅萬室之如櫛富商巨賈肩摩袂接北通朔

漠南極閩越西跨流沙東涉溟渤來百貨之繼備
 輪蹄之填咽珠璣爛其輝燿羅綺燦其騰香至若青
 樓並峙綺榭相連妖姬窈窕艷女嬋娟穠妝鏡倚份
 黛爭妍引歌喉之宛轉迴舞袖之蹁躑極酣嬉于暇
 日窮勝賞於芳年至若太液之池萬歲之山澄波漱
 澗層岫噴岍開闔蔽虧縈帶迴環竦飛樓于曉曉敞
 貝闕于巖端門臨碧蘚之磴橋架玉虹之灣晴光出
 乎軒檻飛翠洒乎闌干瞻廣寒之月殿撫桂樹之團
 團爾其瑤草龍蔥琪樹羃歷長松之盤古栢之直修
 篁烟挺老檜雲積瑰偉之姿奇異之植蒼然其陰媽
 然其色宛蓬瀛之在茲恍塵凡之遂隔至若上林衍
 沃靈圃逶迤瀦以碧海湛以深池百草綠縟群卉芳

菲寬閒薄乎禁樂平廣屬乎坤維樂鱗介之游泳縱
毛羽之離襪乃有騶虞效祥麒麟表瑞白質黑章麇
身牛尾神鹿貢於遐方白象出于南裔倏玄兔之繼
呈忽天馬之沓至復有馬哈福祿厥獸珠形駝鷄之
異白鳥之楨奇姿詭態率舞縱橫隸首莫紀伯益難
名至若地祇協順天心昭格嘉祥豐臻靈晷蕃錫神
木不運而自行祥氛煥發于巨石忽靈蛇之前導現
火青于沙磧瑞光煜乎半空卿雲縵兮五色醴泉湧
兮瓊漿甘露滂兮玉液靈芝產于碧山景星見于南
極禿千兔以難窮殫百喙而莫悉然而歷觀前代迄
於往古帝王所都難可畢舉豐鎬之美崤函之固宛
洛之奇汾晉之富雖或雄據于一時控馭于中土而
於今茲帝都之壯麗又豈可以同年而語哉迺成慶
子告成厥功辛丑正旦方春和融聖皇御寓萬方會
同百辟卿士肅肅雍雍蠻夷戎狄罔不率從戴白之
叟垂髻之童且欣且抃拜舞呼嵩仰祝聖壽萬福來
崇慶此皇都佳氣鬱葱擴基圖于萬世偉壯觀于九
重真帝王攸久之業披山河表裏之雄然而聖天子
以六合爲家以四溟爲池以仁義爲干櫓以禮樂爲
藩維不恃險以爲固惟在德之所施至和塞乎穹壤
恩澤洽乎華夷致九有以寧謐躋萬國于雍熙此其
所以德侔乎堯舜道合乎軒羲窮天地亘古今而莫
能與齊也臣職禁垣叨蒙眷顧謏陋是慙涓埃莫補
觀皇都之巨麗壯宏規于往古潔泓穎于長辰陳盛

事以爲賦又從而爲之歌曰翼翼皇都萬方之會兮
聖德之宏實同覆載兮聲教所暨一統無外兮又歌
曰皇都翼翼民之所止兮維皇萬壽福祿無已兮聖
子神孫寶祚萬世兮

揚文敏公集

胡啟先皇都大一統賦若有儒生小臣好古耽文遠
稽虞夏商周之載藉近閱秦漢唐宋之遺言於是歷
冀毫而覽豐鎬睇咸陽而望長安仰東西兩京之制
於往昔觀南北二京之壯乎今日載閱淮濟載涉河
易爰眇太行爰俯謁石顧并營以傍徨履滄薊而蹶
蹠觀於都城則氣象弘廣卽夫山川則形勢雄壯其
物產之利素豐饒其人民之俗尚義讓乃上天之眷
命而聖人之化成實在於斯故我朝肇建皇都而天

下一統宜在於茲耶方歎慕而未已若憫悅而何之
廼有先生長者雍容怡愉邀坐而問曰吾聞登山者
必卽其崇岡涉海者必測其汪洋今子游觀於皇都
能舉其大綱乎願聞其說生曰唯唯生雖不敏請陳
其槩夫四通是交八達所會水走舳艫陸奔輻載皇
拱萬國囊括四海其宮闕則奉天華蓋謹身三殿以
正位乎外乾清坤寧兩宮以正位乎內位夫西則武
英爲宴居之密位夫東則文華爲繼體之大其尊卑
以天地爲法象其交構與陰陽相合配駢集夫杞梓
之材文彩夫元黃之績旣觀天而穹窿極磐地而磊
瑰民庶咸子來工師呈巧最實所謂華美而不奢泰
者也其都城方廣萬雉弘闢九門建樓設閣通道達

關晨鐘暮鼓更別漏分士夫林立而商賈雲屯者也
先生曰此特宮闕城郭之美而已願更其辭於是生
復請曰今之皇都古爲冀州伊洛距其前恒嶽倚其
陬環西山而作城界東海以爲溝羈梁雍而絡青兗
控戎豕而御吳甌導江淮以共注引河濟而北流卽
金臺瓊島之可登望撫大液瀘溝之可泳游阻居庸
古北以爲關則遠人震懾關趙魏齊魯而成衢則侯
甸來朝故宜帝皇之都而爲萬世之良謀此太祖之
所以創業而皇上之所以闡皇猷也先生曰此亦山
川形勝之槩而已願悉其大於是生復請曰地土肥
腴千里巨壤良木冬榮嘉禾夏長松栢檜樟梨栗棗
橡成林叢生干霄直上黍稷稻粱桑麻菽粟豐年蔽

野暢茂接屋一夫所耕十夫是足一歲所獲三歲之
蓄於焉克棟而資廟廊供粢盛而具廩祿也又有珍
禽異獸則若鷹鷗鴻鵠熊猿雉兔虎豹麋鹿翱翔郊
藪馳驅林谷隨取而獲應捕成觸于以備畋獵而具
蒐狩供宴饗而資庖肉也先生曰地利之美可以養
人而非所以成化者也於是生復請曰方今四海一
家萬夫同志典文治者咸臯夔稷契之徒任軍旅者
悉呂召孫吳之類故六卿協衷而五軍整以加之居
藩鎮者各恭厥職處守令者咸敬乃事是以郡禮樂
而邑詩書家和睦而人孝弟農樂耕稼士懷忠義商
通貨財工精技藝梯航而來襁褓而至也先生曰子
知所以化及於人者然猶未推夫所以受命於天者

也於是生復請曰陰陽調和四序順理雨暘以時寒暑應氣慶雲見乎天醴泉出乎地麒麟貢而鳳凰來龍馬獻而獅子至以及景星甘露之祥芝草嘉禾之瑞白象元兎之奇素鳥鸚鵡之異自皇上繼大統基皇圖以來莫不駢臻而畢萃於以見上天眷命之隆而帝皇萬世之兆基於是也先生曰子知天命之所在然猶未究夫感化天人之大本也於是生乃載拜而復請曰維我皇上聖神文武德合天地道貫今古其繼天立極與伏羲軒轅同制度也其化天下與唐虞堯舜合規矩也其順天應人與商湯周武協呂律也故宜建宮城以爲居保山川而自固地利之豐盛獲天人之順助爲天地之君師作萬世之父母尊

居天位安享國土言未訖先生大笑而語曰斯言盡之可書以爲皇都大一統賦文翰類選

黃佐北京賦粵若稽古帝軒都涿高陽幽陵宅繇北廓堯之爲君始於唐而建國周封其後亦於薊而列爵帝德丕隆莫尚於燕明庭萬靈之所朝光被四表之所先夏后治水則夾石碣石召伯分陝則錫山土田所謂王不得則不王而秦漢乃棄置於窮邊契丹則南京始建而中都大都遂代興于金元天將俾于有德於是文皇肇建爲行在應大興之顯符光黃唐於遐代北平易名以順天旋坤軸以正乾蓋此寔天府之國乃混一之大都會其地博大而爽塏直若繩直而砥平倚重險而壓函夏屹若坐堂皇而跡廣庭

盪幽并之氛霧揭日月於泰清綬端門以普照合宇
宙而大明惟帝降祥匪人弗戒假手於至元而豫兆
是名矣蓋淪胥五百歲天運剝極而後復析木開津
元冥司袖望醫閭以爲鎮宗恒山以爲岳水環繞以
爲員山雄峙以爲幅嶠峪叢乎沙渚跋淀注乎旱麓
熊羆而牧者五擾之畜穰穰而穫者五種之穀朝宗
則河濟淮海守險則漁陽上谷儼基謀之不臧奚景
命之有僕聞築黃金之高臺思展賢才之驥足求文
武以戮力遂永綏乎天祿及至定京師建辰極也縣
水樹臬規元矩黃罽緯冥合龜筮襲祥營繕釐其務
司空提其綱命離婁使布繩施隸首之筭章枕居庸
於紫塞環瀛海於博桑襟滹沱於青色擁太行於維

棠廣九門以通軌摹八區而辨方地不受寶天降珍
物神木自行山石自出巧倕公輪剗剔綴秩獻俸捐
金功成不日闔重城於天陔森飛觀之盤蔚長虹帶
通壑以委蛇萬雉冠崇墉而律躡輦道纒屬朝著彪
分周廬拱衛列應星文長安大達冠蓋繽紛其下九
涂簇集輜輳曳髮編芊鋪若烟雲戎匠受役伎藝精
勤角隅珥市廓隧孔殷踈榭映肆散帙典墳鼓篋固
多霏霏文雅之士而感慨悲歌者亦任俠而成羣於
是邸舍填溢履不容旋紅塵冥冥幕面頰肩如嬋女
士輜帷高騫明眸元鬢金翠翩翩當折筭而易芻亦
豔妝而送妍貴璫要鉉子姓童隸僭侈自雄司察反
避衣狐白而策乘黃樓姬姜而棄樵悴昏酣睡毗以

執讐旦暮椎埋而弗忌京游之士寔繁有徒通籍禁
闈噓榮翕枯賂之則升天階忤之則淪淵壚豺狼晝
伏於當道而惟調彼稷鼠與城狐至於翱翔四郊走
田飛弋鬪雞蹴鞠罔事貨殖儵掣金以訾價俄躍馬
而鳴鏑誅皇路於天衢是以姦慝發而亡迹益圻甸
提封會歸攸止險其走集守其要鄙兼夏商之職貢
奄秦漢之文軌梯航絜乎九譯廐置通乎萬里其陰
則天壽磐固長城崔嵬古北喜峯蘭峪黃崖重關疊
嶂之槩天守以一夫而莫開彈琴鳴乎其峽黃花鎮
乎其隈大翻越乎湯峪媯川流於懷來野狐獨石之
寇轟龍沙瀚海之滌洄攬蒙狄於開平通龍虎之橫
臺北征于時而振旅霓旌參簇乎斗魁酌葡萄之玉
液旃裘伏而獻醅其陽則三橋萬柳玉河通惠潮白
桑乾百泉所會緯以涑易磁濡經以淤塘漳衛掖以
大陸封龍撥以井陘無棣襟黃河而帶伊潁絡齊魯
而苞趙魏登披雲以延佇見天津之遐濫東吳輪乎
秣稻叢雲颿以如薺鱗介泳於川涓萑葦紛乎旆旆
海陸產乎珍美雖林間莫能以淵計東郊則有潞河
之灣通漕之流控引江淮運集輳艘萬國冠裳以發
以休玉田黍谷蒙繹之罟跨遼瀋而踰鴨綠山川菴
藹而相摻嗟燕貽之妄謬迎羽人於丹丘汎延芳於
瀟陰得契丹之莽洲鶯鶯散而海青翥尚餘回極之
浮浮西郊則有玉泉垂虹西山積雪西海激波流入
皇闕虛師二龍蜚遯潭穴平坡翠微五華屏列潭分

玉淵蕭爽皎澈崆峒石經之天嶠大房孔水之融結
越鹽溝與劉李乃縱志而舒節過督亢之荒陂悲丹
軻之計拙返薊丘而眺廣陽躡齊政而蔭禪穢渺西
湖之蒲荷絕龍舟之纜繫水天混而光流涵沙禽於
鏡月爾乃朝陽近郊將臺威陀偃武云久講藝投戈
崇文覲路曲接海涯率茲潞渚至于白河直沽湍瀉
灌溉靡多開鑿成隄天有麥禾穰穰歲獲富我天家
正陽之南苑圍闔拓三海汪洋四序弗凋按鷹有臺
飛放攸泊狐兔嘖嘖麋鹿濯濯浮飲衝波宛澤漚洑
其淵則有文蛤水馬朱鼈金龜絕綸巨鯉衝罟奔鯢
鱗鱗繁於涿光鱗鱗詭於靈囂其坪則有雲木烟蘿
森林裊裊隄柳汀蘆綿梨火棗梧竦鳳條槐舒龍爪

森至紛披與波浩漾其渟阜則有鴈鷓鷁有鳧鴛鴦
水宿萬羽叢泐廻翔其叢伊何葭茨蒼蒼靡蕪茅苜
藁本莎香射干陵苕堯韭禹糧芙蓉莖莖兔絲鹿腸
其與曠則多松櫻榛栝楓楊楸檉籐輻梓梅杏棠
棣六駁四照日曠雲蒂雨霰風胎並育庶類猿鶴蜚
征經息百態上有捕雀垂鳶之錦颺下有嚇虎綴毬
之刺蝟初疑趨撲之可及倏已騰躍於無際區彌祝
栗界軼咳弓丹翠菴藪仰不見空映流溢望激灑成
饒賜不漏景陰不翳風密孕元氣昭鋪化工鳴嗶互
而域別谷籟答而響同虞官待狩玉鑿間入扈以羽
林騎而袴褶長圍漸合羽毛畢集軒鉅來而贛忘歸
蕓韎鞞而飲決拾鞬適脫而戾穹昊條甫解而彘遐

隰於是旃門張華於揚凝笳鳴疊鼓鬢迴颺颺起焯
焯發矢命中巧於更羸冒結而震網搖撞秘而坤軸
昂翩翩匿爪而迅攫徻徻掀斷以交鏘其獲如雨割
鮮舉觴羣工霑醉分挈賜盼蓋講武事於農隙而匪
遊豫於太康爾乃西循宣武越彼金岑草場蕃育舒
鴈翰音野塘鳧藻咬呷浮沉至于阜成苑開上林芬
蔚蔓藟蒹果成陰崇桃蕢實乃玉乃金花紅青翠香
水黑琴朱櫻素柰若榴丹椹虎刺斑於楹棹蘋菠楸
於來禽英絡其間蟬秒相引亦有嘉蔬綺蒸豐本黃
芽赤根天花石菌蕪菁芸臺葵茄薑薑菜菔頗於夏
萼水蘇脆于冬笋逆蘇循崖元厲赤脂青蒙白堊金
星畫眉貞珉類玉可礪可碑宛平瀛壤陶爲琉璃光

瑩鑑人結甃成職雖拳石與撮土亦鍾淑而瓌奇遵
西直而北指經得勝與安定憇東直而迴眄歸瑜珈
之海印纍毛羣於幽都以谷量其孳孕陋彼周宣之
考牧匪直牲牲之肥脂至乎御馬之苑惟二十區日
閑輿衛歲產龍駒肇昔八駿以靖難迄今七驥之翰
如乃有傍葛麻林麒麟並車周郊石固迭獻騶虞福
祿文逾於吉皇元虎豪勝於黔菟馬哈雙角垂腰而
類解馳鷄元翎玉翻而異餘凡致諸福之物有王會
之所未圖而歲華月化莽爲藪蔭尚存馬政之流弊
民瘼奚繇而告蘇然而始設京輔之屯分自留衛之
半起富民以充殷實予以均貧而杜亂於是弛真定
廣平儼薄之田賦與河北滄濱之鹽稅而不筭時築

雲代之墩臺歲防河間之水患於萬斯年既隆內治而謹外扞矣馭世長策豈非超黃邁唐爲百王冠者哉其宮室也闢丹地之焜煌閱天闈以高驤垂若華之景曜儷望舒以相頌晃黃萬疊煥欵舒邊螭旋鱗萃屹若崇岡抗浮雲而上征亘玉繩以齊光正殿則奉天尊嚴陵霄填極華蓋承宇居中儼特謹身聯後益邃以血縣邈豐彤膠羅坂減重陞雲簾花礎盤礪四面軒洙下甃瑤城瑣牕藻井間金繪飾上規圓以穹窿下矩折而繩直楹繞金龍以甄甍檐騰神鳳之翬華繽紛九采之璀璨卷畫梁擘之絡繹其前則奉天之門常朝是衙嶺聆倜儻岳岳峩峩飛宇建霓枌棋蒸霞陰蚪負楹陽馬承阿中奠黃屋鏤以金華結臺開軒舍景敷葩八維像乎紫極四表達於絳河通緒風於闕隙流旭日之靈蘇闢披四目陛納九齒明翼等威玉筍攸止鬼瓊樓而立兩旁文武分而鼓鐘峙出掖門之東西棕蓬延而對起曰思善與景運于左右而迤邐雲闕翔五鳳於璇霄玉橋亘三虹於金水直廬宿衛容裔於前而斜廡轟轟乎其相睥午門之內殿閣嶙峋東有文華蒼龍守闈上憲攝提析木之津先聖先師祠禮惟寅啟嶧山之碧鏤蹠荔丘之廣輪扈以文淵東觀與鄰史館聯開雕牖相因册府甲觀圖書萃珍西有武英金虎環陛象彼觜觿衡石積層虹梁竦棟截莫迤邐端居存神修令發制牙璋葆旅焱動雷厲百爾幾務罔有停滯左入太廟迨廟

街門四孟時享對越駿奔東建齋宮高廣端正簡樸
無華適萃誠敬官垣之外東苑是營坦涂豪微逋接
南城濬洫嬰堞靚深覲宵夾路嘉植攢峯開沼林霏
幽塊石瀨廻繚天然縣圃中有壺嶠時端陽聳翠華
翔建駕棚集龍驤擊綵毬射垂楊帝子王孫金玉交
相薄言觀者股肱之良勁捷驪讌藻詠栢梁永樂之
世角執惟常亭臺經始宜朝雅制天順復辟式廓以
麗龍德之殿拱振正中崇仁廣智左右相雄彤扉瑤
砌璧檻綺櫳其門則丹鳳在南蒼龍在東殿後秀巖
翠黛騰空環屹運之團殿聳縹緲之奇峯巖亭旁峙
凌雲御風玉梁在前追琢璵璠夾以天光雲影表以
戴鰲飛虹永明佳麗窈窕相通環碧石陰淙淙溶溶

錦鱗文禽喁喁雍雍淨芳瑞光門閣穹窿跨以翔鳳
梯霄頰潔別有閒館嘉樂昭融出入東華是謂南宮
凡其金鋪朱戶莫不掩映乎芳叢聖皇大孝世廟觀
德易乾德以重華列鴻慶與崇質仁以欽天孝以追
先二閣並樹巍乎煥然浮丹麗紫納雲冠月負辰萃
誠達于天闕協鴻名於大舜終以崇先而昭揭右社
街門入祭社稷爲民祈報如幾如式又有西苑越在
子城入自西安出則乾寧萬歲之山秀拔崢嶸太液
之池環抱泓渟雖名由元立天肇明禎然徒宋良岳
延引玉泉則金秋之所經營其遵甕城而陟丹梯也
攀承光之金殿躡飛鯨之石梁踰數百武則鐵絳丹
檻浮游蘭槩達瓊華島登廣寒殿而超方羊適而聯

之玉螭金鰲堆雲積翠坊表金碧照映松檜遠而望
之崧岱並立大河橫帶俯視江淮一目無際恍若凌
倒景而躡鵬翎入鈞天而聞鳳吹飄飄霞舉豈非快
哉梳粧高臺已化蔓草而仁智列楹據山半者亦幾
經興廢矣介福延和厥門尚存而昭行殿建自先朝
者實爲大觀東有凝和陸離馭馭浦淑烟綿龍舟鳳
舸西有迎翠遙挹山光林幽鳥悅岑蔚翱翔東北太
素草繕塹飾質任自然如植圭璧九島池北涵碧亭
亭丹檻翠牖隱映淵激緣崖徂東樂成觀櫓雲確風
輪千以春杼承光南漪崇智在茲金蓋玉檻旋匝循
磯芭蕉園南灌水蕨蕨日照和者越紅亭闢黃扉而
見水田農舍乃知小人之依從南臺達西隄過射苑

轉芳蹊入兔園小山之門而躋焉洞泉九曲金龍注
池松蘿陰陰居然青谿出園東北瞰池倚壁暨後左
門亦寘翼室各有平臺迢遙靖密武廟於斯閱騎射
而吾皇恒以延輔弼軒口遠趣館曰保和亭則歲寒
飛香與擁翠映暉會景與澄波飾爲錦芳亭前有沼
故湖通池花卉圍遶翠芬出于竹陰寶月藏乎樹杪
玩芳距凝素以芬葢臨漪俯美金而淡晶皇營新殿
清馥是名芝楣繡拱虹植電衡耀碧霄以紺閣垂毓
華之光晶牡丹紅藥之屬普受和氣而嘉生至於園
有丹桂綠椒渚有芷蒲蘅杜而鸚鵡天鵝諸栖泊者
又莫知其數鬣獅異獸石臺銅柱收放其間匪直瓊
龍與騎兔周文靈囿於焉再睹蓋自元武門外出北

上中山勢蜿蜒而未窮其下周迴百菓龍夔出其委
翳回眄天池翠島真蓬萊之在九重也迺立保泰格
于元極殿聯無逸所重民食亭揭函風耕籍黍稷倉
曰恒裕扉曰寶穡壇祭穀祇五福時錫復有蠶氏之
館採桑之臺以備親蠶繰織剪裁修飾仁壽之宮踏
六盤而造三台嘉禾連穎甕繭成筐則奉慈闈而進
仙杯緹幙翬鸞風車徘徊而神御望清之閣頰清虛
而洞開於以見皇心仁孝慝元真而洽滄厓乃若後
宮則有奉先之殿次以奉慈禘則太先永言孝思配
帝明堂睿宗惟宜夙御景神寶善慎獨休明昭融迎
祥安福玉卮金屏祇祇肅肅清寧之宮棕殿以朝後
園炫映樹玉池瑤乾清坤寧兩儀成象純殷寶勢闔
闢相嚮房闈內布絳疏外陳六官旁列爰處如嬪東
則延祺鍾粹毓德西則啟祥隆禧景仁複道迴衝以
聯絡掖庭阿那以架循百子符螽斯之蟄蟄千嬰應
麟趾之振振碧瓦鱗差朱門雲輦欽安中黃表儀四
極雕欒鏤案蕙樓椒壁髹彤殷乎珠櫺芳馨流乎翠
帟明珠燭元夜以爲晝列錢耀白簡而成色居瑤光
之壺輿御瓊珍之象席銅龍愆節其興居銀鑰嚴坊
于斯夕日精承千祥之滋至月華炯百福以翌翌東
宮左達鶴禁透隨西內作對燕居惟時黜儻麗嫺安
樂且綏撤大善而燬佛骨崇聖學以恒緝熙堂有精
一執中弗違室有恭默匪道弗思齋有九五天德是
祇亭有敬一御箴永貽乃宸皇史以寶芳策今可述

而古可稽皇城東南蒿宮宏啟長孫所居軒墀戟香
東安翼隅十王有邸差次儷陳皇皇鞞鞞前星重輝
天潢分汜萬楸鸞浮千栴鳳起迨夫光祿太官六科
黃門尚寶之司亦邇東安黃衣有徒灑埽供事儀文
璽綬以及櫪駟監局之號二十有四銀瑠珥貂時維
闕寺出入絳闕捧擁瑀輿遵我綸綍敬慎不渝于時
天顏正王道復顯巍巍徽穆穆昭景鑠絕芽慾龍威
元端齋明盛服貫魚有序六尚分局永巷情情皎若
承旭出納精微無遠弗燭乃若九門中恢京城之前
孔道馮隆其直如弦文皇肇祀合地於天爰集靈壇
接以山川制倣畱都獻歲揭虔壇分四郊吾皇攸建
乾父坤母南北裸獻兄日姊月東赫西烜二至二分
受釐錫羨祈穀舞雩亦酌不編昭明寅畏用德克堪
卿雲呈緇瀟露飛廿六幕清宴百嘉鬯單窮靈極祉
有圖牒所靡談者矣是以白環碧弩之貢日旅彤庭
之琛星聚河清之歌歲登樂府之詠讎侏之從王化
猶洪聲之收清響雕題之樂神州若游形之招惠景
會同之館惟見其來烏蠻之驛不聞其曠攜旄倪而
爲家日嬉遨乎市井觀治化之元同徵邊陲之無警
爾乃設官分職宅俊陟明長安左右三事九卿文武
分闈曹司坐扇玉河東西詹案翰瀛太醫列院欽天
步星太僕設寺考牧于京鴻臚行人各守典刑督府
叅以奉常法司聯乎貫城五軍之外三千奇兵益以
神機爲三大營簡其精銳則立團營十二丕振乎天

聲然猶偃戈鋌修俎豆而樂育胄監之英是以宣后
儲神矢詩於穆清北整崇文之閣而思天下化成承
天之門具瞻攸聚月朔京尹率見宣諭黃圖璫錯正
厥稅賦太倉儲粟積瑞紅蠹督以司徒出納俵漕北
控九邊是致是附垢玩綦於正德四家斃乎百度鎮
卒不留屯而折色是需鹽商不詣邊而轉運民部墩
臺日傾什伍暴露唵答內侵皇赫斯怒尚賴乾符助
順坤珍助富邊郎萬鏹資徧于長城工程百爾惇大
而成裕苟徒苦節駕言守素則是絕文字而結繩棄
冕緹而冠布也爾乃練時日選車徒萬乘出七萃驅
稜恩揭殿陵祀之居行官開闕沙河之途思先靈之
陟降越昌平以北盱精禋畢戒射夫弋欽殛殪封狐

龜氓磨至臬鏡畢峒銀山鐵壁陽翠軍都星奔電掣
冀馬燕弧田獲庖充爰賜大酺乃幸九龍之池藥時
間萬歲於寥廓大烹陳鞞鞞作天酒熏皇情樂薄暮
言旋軍麾動乎朔漠皇不自聖周爰咨謀勲戚鼎輔
召邇前旒足食足兵幃幄運籌內帑克乎十庫外廩
貯於通州鈇櫨芻粟飛輓若流築外羅郭紆南牧憂
巍巍金塏枚枚雉閣包括崇文竣于宣武黔首樂依
光我成祖建旄于以標望不可仰而可俯雖使都盧
之巧捷不敢以投足翔鶴之扶搖不得以運羽由此
論之策天功以臻成必有非常之元不惜小費乃罔
後艱是故衿帶周則保禦易楨幹固則搖拔難淵源
深則瀾派浹盤根大則奕葉繇盍觀諸天平上提三

光下輪厚坤連珠合璧日發歛而不憚其煩迺能榮
百昌於萬古鋪元氣於人寰秦泉集

按桑悅

馬斯臧黃器先

帥機皆有兩都賦借抄未得

俟補錄

鄧林皇都大一統頌天作神京山河鞏固聖皇宅之
永隆寶祚大明啟運定鼎金陵皇上繼統再營北京
維彼金陵俯臨淮甸龍飛渡江洪基肇建維此北京
冀域堯封龍潛舊邸王氣所鍾昔在太祖心存北顧
允惟聖皇是簡是副聖皇文武謨烈祇承聿追來孝
聿觀厥成歲在丁酉星中營室正於四方元龜告吉
工師効力山川獻材四方和會庶民子來爰法天經
爰因地義斷自宸衷率由舊制廼營三殿三殿堂堂

乃立九門九門將乃築圜丘乃除方澤父天母地
于焉昭格乃嚴廟社乃定市朝規模位置秩焉有條
龍樓中岷鳳闕前峙禁城萬雉邗畿千里乃廓阿閣
玉戶金鋪赫然壯觀偉矣弘模府第星羅廬井櫛比
萬象一新兩京駢麗歲在辛丑告厥成功元日甲子
帝御九重虎衛嚴宵鷄人報曉雨露頒恩絲綸下詔
萬國執玉八蠻貢琛天下一統臣民同心洪惟聖皇
與天合德營此北京象彼北極維北有極環拱衆星
維北有京包舉八瀛洪維聖皇德備神武郡縣南交
衣冠朔土洪維聖皇治備聖文六合爲家一視同仁
拜手稽首聖皇萬壽與天同長與地同久拜手稽首
聖皇萬年博厚配地高明配天日月貞明山河帶礪

聖子神孫本支百世簡編有紀金石宜鐫臣作頌章
永世其傳退庵集

郝經入燕行南風綠盡燕南草一桁青山翠如掃驪
珠畫擘滄海門王氣夜寒居庸道魚龍萬里入都會
湧澗合沓何擾擾黃金臺邊布衣客拊髀激歎肝膽
裂塵埃滿向人不識骯髒偃蹇虹蜺結九原喚起燕
太子一樽快與澆明月英雄豈以成敗論千古志士
推奇節荆卿雖云事不就氣壓咸陽與俱滅何如石
晉割燕雲呼人作父爲人臣偷生一時快一已遂使
王氣南北分天王幾度作降虜禍亂袞袞開其源誰
能倒挽析津水與洗當世晉人恥崑崙直上尋田疇
漠漠丹青跨箕尾陵川集

王廷相帝京詩帝京南面俯中原王氣千秋湧薊門
渤海東波連肅慎太行西脊引崑崙九皇天運坤維
奠萬國星羅北極尊堯舜昇平見今日按圖形勝不
須論家藏集

吳國倫燕京篇擬賦燕京勝三都未足誇霸圖雄鷹
塞古戍扼龍沙北谷回陽令西山擁帝家天平恒嶽
迴地險薊門賒秦楚慚鷄口侯王屬犬牙重城開御
氣雙闕倚明霞芳樹華陽館高臺易水涯談天曾竭
石望海卽瑯琊帶甲環三輔梯航走入遐風雲森劍
佩雨露足桑麻紫陌新豐酒紅樓宛洛花輕塵飛白
練旭日麗青緇雪色并兒劍星杓漢使槎羽林矜節
俠戚里競紛拏接軫趨長樂揚鞭過狹斜悲歌逢擊

筑斥堠警鳴笳七校傳清蹕諸陵望翠華豎儒何寂寞
抱影獨長嗟

蘇軾洞業

陶望齡帝京篇地軸幽燕壯星辰北極尊向明開帝
服面勢敵天門天門帝服何雄麗到處煙花夾朱第
崔嵬古臺黃金築迢遞離宮白玉砌儲胥百萬護嚴
更十二交衢繞鳳城見啟北門封將校新開左掖召
儒生連艘千里吳陵粟擐甲三營突騎兵旗亭分隊
起輦路入雲平搨車隱隱闐街轉流汗窮冬氣猶喘
說劍相邀過慶卿談天何處逢鄒衍走馬東門繡陌
新角弓珠彈鬪芳春曾持紫綺裁行帳共屑梅檀作
遠塵七貴豪奢何不有材官導前蹶張後蘭錡分將
御使陳椒房自合君恩厚董家小兒元賣珠霍氏大

奴公使酒榮華銷落須臾事盛滿尋常多怨忌但見
交遊去翟公空傅丞相過車騎山來破甌難重炊出
來素髮難復緇千金處囊意氣盛一朝脫手爲人欺
若看世事共如此獨傍悲歌高漸離

歐庵集

徐燧帝京篇文皇定鼎都燕薊三輔黃圖誇壯麗九
重宮闕何嵯峨百一山河咸拱衛五鳳高樓逼太清
六龍御宇泰階平臙朧曉日升金闕縹緲紅雲擁玉
京玉京金闕倚天開隱隱鑿輿復道來雲迷翠幃依
龍袞露滴金莖泛羽杯平明長樂鍾聲響九天日月
開仙仗豸史臺中曉聽烏虎賁階下朝鞭象月照彤
墀環珮齊風生青瑣旌旗颺高臺突兀比章華上苑
紆迴同博望我家京洛何煌煌山河錦繡鞅隋唐辯

髮文身俱稽顙雕題黑齒盡梯航三載公車計偕吏
嚴樂鄒枚乘傳至黃紙承恩金馬門綠衣賜宴慈恩
寺勅賜當街上五花金鞭絡繹更堪誇市中春色濃
如錦身上宮袍爛似霞粧臺舞榭層雲裏粉白蛾黃
兼皓齒怙寵翻令女伴憎承歡卻得天顏喜更有中
涓美少年朱顏白首珥貂蟬當筵解唱霓裳曲出直
常揮碧玉鞭一代豪華稱戚里回天轉日誰能比薄
暮酣歌開闔門平明取醉新豐市繁華三五上元燈
蜀錦吳綾結作棚任從玉漏催銀燭不顧銀河轉玉
繩馬上佳人金絡索筵前公子玉壺冰懸得華燈燈
七寶搆成綺閣閣千層中宵露冷羅衣濕姣童兩兩
當筵方夜永寧愁鳳腦殘寵移豈顧龍陽泣侯家繡

柱玉盤龍朝朝鼎食奏歌鐘翠翹金鳳三千隊畫閣
雕闌十二重繡枕春宵開茵苔羅幃夜月絢芙蓉五
侯七貴豪華客油壁香車過柳陌花前調笑片時春
百萬黃金輕一擲春風日日恣遨遊北里南隣樂未
休玉顏到處堪迴轍珠箔誰家不上鉤青錢多買醉
紅袖暗藏闔投來青玉案費盡錦纏頭躡躑紅袖人
如玉豔舞嬌歌歡不足琥珀深杯醉玉樓珊瑚寶樹
羅金谷灼灼桃花兩頰紅娟娟柳葉雙眉綠愁縈弱
水遠重重夢繞巫山高六六王孫公子好遊閑往來
射獵向西山驅將鷹犬垂鞭去射得狸帶箭還九
衢三市相迤邐車塵白日連天起六郡良家盡錦衣
四方賈客多紈綺錦衣紈綺競豪奢結俠追歡意氣

賒論交半是蕭朱輩托命多於趙李家華堂宴會春
風繞一派絃歌聲嫋嫋香氣頻聞寶鴨熏漏聲忘卻
銅龍曉春來春去自年年聽盡笙歌與管絃但知芳
草春風滿誰識鶯花歲序遷自古奢華豈能久轉眼
紅顏成白首往日堂前羅異花于今門外生衰柳世
事悠悠未可知桑田滄海須臾期金張許史今何處
富貴驕奢空爾為

幔亭集

日下舊聞卷二終

日下舊聞卷二補遺

形勝

自太行山而北不知山所限極處亦如東海不知所窮
盡也

博物志

宣府大同藩籬也居庸紫荆門戶也順天真定保定等
府州縣堂室也藩籬密斯門戶固門戶固斯堂室安

漁石集

梁本之為魯王賀建北京表兩京肇建創萬年磐石
之基九譯來王恢一統太平之治天人協贊宇宙騰
歡陛下道冠古今德同堯舜如天地之大萬物涵覆
載之中如日月之明八方剛照臨之內於是定鼎在
興王之地建都效卜洛之規瞻恒岳而控西山躋居

庸而挾營勳壯九重於南面運啟文明峙雙闕於中
天高連營室百工和樂而趨事庶民悅豫以子來慶
雲見五色於瑤階瑞日煥重輪於帝座吉蠲元旦而
登五位式負黼屨以朝百官道里均平山川鞏固於
此繼天出治發政施仁禮樂明脩而三階砥平垂拱
無爲而四方來賀此所以承天意之所屬而致宗社
於永安也臣叨守親藩躬逢盛事綸音誕布允爲洛
誥定命之書鴻業告成載詠鎬京復古之雅 坦菴集
自宋員外廸以瀟湘風景寫平遠山水八幅一時觀者
留題目爲瀟湘八景南渡詩人若陳允平衡仲張槃叔
安周密公謹奚滅倬然皆有西湖十景詞而北平舊志
載金明昌遺事有燕京八景元人或作爲古風或演爲

小曲所謂八景者居庸疊翠玉泉垂虹太液秋風瓊島
春陰薊門飛雨西山積雪盧溝曉月金臺夕照是已至
永樂間館閣諸公相集倡和更薊門飛雨爲薊門烟樹
或又增益二題爲十景和者相屬因而十室之邑三里
之城五畝之園以及琳宮梵宇靡不有八景十景詩可
憎甚矣 寄園寄所寄錄

胡廣北京八景圖詩序明昌遺事有燕京八景前代
士大夫賦詠往往見於簡策聖天子肇建北京爲萬
方會同之都車駕巡狩文學之臣多列扈從翰林侍
講兼左春坊左中允鄒緝仲熙曰昔之八景偏於一
隅猶且見於歌詠吾輩幸生太平之世爲聖天子侍
從臣以所業而從游於此縱觀神京鬱葱佳麗山川

草木衣被雲漢昭回之光昔與今又豈可同觀哉烏
可無賦以播於歌誦衆咸曰然遂命曰北京八景問
更其題一二仲熙作詩爲倡於是繼賦者國子祭酒
兼翰林侍講胡儼若思右春坊右庶子兼翰林侍講
楊榮勉仁左春坊右諭德兼翰林侍講金善幼孜翰
林侍講曾棨子啟林環崇璧翰林修撰兼右春坊右
贊善梁潛用之翰林修撰王洪希範王英時彥王直
行儉中書舍人王綬孟端許翰鳴鶴暨廣凡十有三
人得詩一百二十四首乃爲爲圖并集諸作真各圖
之後裝爲一卷藏於篋笥他時歸老優游江村林屋
之下展而觀之撫其景誦其詩豈無玉堂天上之思
與夫平生交游出處之感耶

胡文穆公集

李益幽州詩征戍在桑乾年年薊水寒殷勤驛西路
此去向長安萬首唐人絕句

李源道燕中懷古詩燕王墓上草離離郭隗臺前對
落暉戰國山川秋氣壯中原豪傑曉星稀乾坤納納
無人識南北年年有雁飛說與盧溝橋畔柳安排青
眼送人歸元詩體要

居庸曹王大安黍谷崆峒之山環抱如箕而燕城峙其
中其地如掌雞肋集

大地之脉咸祖崑崙而南北二絡最大北絡極于幽燕
大河至此入海與鴨綠江會東有下沙此山水一大交
會也其北崇岡千疊其前坦平千有餘里泰山聳于南
誠國家萬年之基也莊渠遺書

端拱二年將討幽薊詔羣臣各言邊事宋琪疏上謂徑路所趨必若取雄霸直進未免更有陽城之圍蓋界河之北陂淀坦平北路行師非我所便况軍行不離乎輜重賊來莫測其淺深欲望回轅西適山路令大軍會于易州循孤山之北漆水以西挾山而行援糧而進涉涿水並大房抵桑乾河出安祖砦則東瞰燕城葢及一舍此是周德威收燕之路自易水距此二百餘里並是沿山村墅連延溪澗相接採薪汲水我占上游東則林麓平岡非戎馬奔衝之地內排槍弩步隊實王師備禦之方而于山上列白幟以望之戎馬之來二十里外可悉數也下文見二十三卷桑乾河水屬燕城北隅遶西壁而轉大軍如至城下于燕丹陵東北橫堰此水灌入高粱河高粱岸狹桑水必溢可以駐蹕寺東引入郊亭淀三五日瀰漫百餘里卽幽州隔在水南王師可于州北繫浮梁以通北路賊騎來援已隔水矣視此孤壘浹旬必克宋史本傳

昆田謹按釋宋惠安疏則桑乾河水當日乃在燕城之北今則深谷爲陵桑乾出山之口不在盧師祠下而在石徑山麓矣

胡旦上平燕議曰幽州在北門之外天時地利人事皆在可伐歲之所臨其地受福今年初秋至六年鎮在燕分從今年爲備至來春興師北兵遇春夏則旃裘皮履羊弓塞馬不爲用而中原士卒素不能寒往北逢暄筋力勇健以勇健之士驅不用之敵乘福慶之時討災殃

之城成功立事在于此矣幽州之北皆是山谷通人馬者不過十處苟塞斷山路餘寇在燕與大軍相持遷延其時以度春夏寇不能熱有退無前逆壘不足下猾寇不足殄也

宋史儒林傳

世宗將幸金蓮川梁襄上疏極諫曰臣聞高城峻池深居遠禁帝王之藩籬也行宮非有高殿廣宇城池之固是廢其藩籬也燕都地處雄要北倚山險南壓區夏若坐堂隍俯視庭宇本地所生人馬勇勁于遼雖小止以得燕故能控制南北坐致宋幣燕蓋京都之選首也况今又有宮闕井邑之繁麗倉府武庫之充實百官家屬皆處其內非同曩日之陪京也居庸古北松亭榆林等關東西千里山峻相連近在都畿易於據守皇天本以

限中外開大金萬世之基而設也奈何無事之日越居草萊愛沙磧之微涼忽祖宗之大業此臣所惜也况欲習武不必度關添易雄保順薊之境地廣又平且在邦域之中獵田以時誰曰不可伏乞陛下回北轅之車安處中都則宗社無疆之休天下莫大之願也世宗納之

金史本傳

孟思詩箕尾分星野軒轅筆帝墟燕山蟠王氣瀛海帶宸居西北饒兵馬東南富國儲太平茲樂土非夢亦華胥

龍川集

京東諸州縣地多卑窪沮洳彌望或云可開水田如江南耕耨法歲收自倍而徐尚寶貞明特主其說具在潞水客談余深是之乃請旨下近京郡縣酌量修舉以尚

寶兼憲職董其事尚寶從河間經始築堤捍水乃之薊
州招南兵之習農者使畫地耕作仍給之餉一時農兵
大集墾田以億計畝收一鍾撫臣及司道方次第開報
而北人官京師者倡言水田既成則必做江南起稅是
稼禍也乃從中撓之御史王之棟疏請罷役而中官在
上左右者多北人爭言水田不便上意亦動召余及同
官于皇極門面諭以水田當罷余對言高田宜黍麥下
田宜粳稻今民間游惰下田皆棄不耕荒蕪寢多故議
開墾非廢已熟之田也上云荒田可開水田不可作余
退而上疏極陳利便而上意竟不可回遂切責尚寶以
爲擾民而初議盡格矣彼中開墾已成收穫甚富一聞
詔下盡撤毀堤岸斥爲開田垂成之功廢于一旦良可

惜也 賜開堂雜記

陳泰朔方歌朔方大野何寥哉悲風慘愴從天來初
如巨壑吼陰浪忽似晴空打怒雷巖風吹霜石爲裂
淅瀝飛沙砭人骨萬里書生二十餘匹馬來爲朔方
客朔方之人膽如斗不關才華關身手無復悲歌慷
慨聲猶能使氣屠雞狗憑高仰視太行山山氣空濛
紫翠間東西日月自吞吐今古烟雲相往還太行勢
盡西山起鳳舞龍蟠聳神偉昨夜燕支雪作團散落
飛花漢宮裏朔方猛士氣凌雲白首防邊未策勲馬
上相逢淚如瀉嗟我何爲朔方野 所安遺藁
幽州之地左環滄海右擁太行北枕居庸南襟河濟誠
天府之國而太行之山自平陽之絳西來北爲居庸東

入于海龍飛鳳舞綿亘千里重關峻口一可當萬不開
南面以朝萬國非天造此形勝也哉

讀書一得

淮南子謂地有九藪燕之昭余祁居一焉藪者聚也王者以聚民畜國夫燕天下之上游也甸服西北控御東南若建瓴然泰嶽峙其南華山環其右前則三案重圍後則九河歸宿誠四塞之國矣議者以爲漢之邊在北咸陽去朔方千餘里唐之邊在西去吐蕃亦千餘里今京師關隘近者百里遠不過三百里居庸吾之背也紫荆吾之喉也卒有急則搯吾之喉而拊吾之背是殆不然譬之一身焉幽燕天下之元首也牽左則左肘動掣右則右掖奮無事則坐享長河之利以爲轉輸有事則席卷燕趙之兵以爲犄角所謂天下之勢莫重于燕其

以此耶順天府志

國家建都北平古爲燕國燕自文公以後立于強國之間北迫戎貉內控齊晉又嘗帥師馳逐中原千里之外此其爲費不少矣蘇秦謂燕東有朝鮮遼東北有林胡樓煩西有雲中九原南有滹沱易水卽今畿內東西所至視昔雖狹而南有渤海鉅鹿至于邯鄲濮陽蓋兼齊趙之地長短相互實亦當之昔者織悉出于其國而今盡仰給于東南非所以富國息民也往時何承矩耕水田于河北虞集議海田于京東脫脫大典營田西自西山東至遷民鎮南起保定河間北抵檀頭皆從佃種水泉陂塘之迹門堰捍築之方召募教授之法器具工作之資蜃蛤粟米之富可以按成式法往智數歲之後其

效立見此與轉吳會漕潞渚功相十利相百矣綱齋集
給事中魏呈濶疏曰周禮幽州藪曰獫養其川河涕其
浸菑時冀州藪曰揚紆其川漳其浸汾潞蓋水澤至沃
也國家定鼎于燕用幽冀爲畿輔負重山面平陸與衍
之利甲于東南若疏其上源自涓滴傳而致之何田不
充何漕不裕惟北方不知蓄水聽其自旱自雨自盈自
涸而莫之均節故潦則遍地巨浸旱則滿眼砂礫一遇
饑歲比屋倒懸民之凋敝極矣誠於平時舉地利而經
理之富民不能供役者必轉募貧民則窘者得食一利
也旱則蓄其流澇則宣其溢則瘠產皆化爲沃土二利
也水道與田疇相通譬咽喉之氣達于肺臟靡所不通
漕可速濟三利也北地種植旣多卽粟米芻芻其將輸

于天府遠可省額外之征近可蠲召買之役四利也原
野有溝有防高下成塹盜不敢援方馳馬五利也夫不
費太倉之金錢而坐獲此五利何憚而不爲乎程垣疏

程曰幽燕行太行亘西天薊門控東海山川何雄深
烈士多慷慨千金重然諾九死志無悔憶昔荆軻子
英風赫如在醉挽高漸離悲歌燕市間旁觀若無人
乃復涕洟瀾太子踞避席頃刻不遑安朝送易水歌
夕入函谷關秦王殿上走羣臣仗下誼把袖志莫遂
負劍已喪元立名輕其身報德安足言至今少年者
甲騎獵平原結客滹沱陰剽吏長安道殺人若刈麻
攫金如糞草鼓鐘宴達旦終歲常醉飽自視七尺軀

焉能曠下老 新都秀蓮集

余光北京賦天燕之爲都也。疊以太行五華之障。函以軍都湯峪之屏。表以岱嶧之罟之鎮。鎬以盤龍密雲之嶠。帶以白露渾源之川。鞏以漳衛直沽之津。扼居庸以制勝。若乘高而建瓴。擁燕雲以馭夏。若坐堂而俯庭。狹關中于西阻。陋中原于四馳。卑齊魯之東藩。逆吳越于南陲。固華腴之上土。天地之弘畿。廣六合以爲宅。極八表而橫披。封畿四環。開地千里。畧其遠形。卽其近鄙。則西嶽爲壁。不下函嶠。滄海爲潢。罔論長河。銀山崇墉。北壓紅羅。巨馬連淀。南迫滹沱。敷搏爽以中廣。歸雄拔于周遭。龍翔鳳舞以自天。玉帶銀山而盤峩。層巒擁翠。重岡飛丹。峴嶭虎眺。巒岈後

蹲。左銘右鐸。拱楯列干。則有翠峯紫蓋。白浮黃花之山。蜿蜒蟻曲。鸞舉蛟騰。懸崖廻赤。峭壁流青。前昂後軒。九折百磴。則有分水八盤。摘星九莊之嶺。臥龍有崗。彈琴有峽。巖棲呂公。崖墜菩薩。石經有洞。孔水時發。桃花有峪。延朗掛甲。蠡旋白雲。谷迷石髮。則是山間之幻奇。幽明之吐握者也。浩浩蕩蕩。瀾森無外。潰潰淳淳。躍龍擁怪。歛霧蒸雲。鱗雄吞介。掀昂奔雷。洶湧傾沛。則有滄溟之海。濕餘浸溢。琉璃回波。桑乾逸駛。易水縈沙。九濟入沽。玉帶淘之。則有百會之河。百泉成溪。玉淵成潭。金盞爲淀。直沽流曇。飛放泊淺。駱駝港涵。車渠之橫。亢陂之湛。則是衆水之濳別。瑞氣之瑩含者也。海有神鼈。巨蝻負蜃。樓蚌珠。擁劍入

帶甲鮒青鱗。巨靈駕而往來。海若鼓而馳驅。奇鱗蛟
蛇而變龍。舍利颯颯而化車。長鯨負山而若漚。修鯢
吞航而罔嚙。又有鷓鴣鷓鴣。環薄于扶桑。鵠鴉鴛鴦。
浮蕩于渤澥。大鵬巨鯤。扶搖于雲衢。輕鷗修鷗。漂沒
于澎湃。青骹奮隼以鷹揚。白羽紛驚而沈介。何風舉
雲搖之匪常。而儻忽莫窮其幻怪。山有昆駝獬狴。巨
涎犴狽。狡狴狴。蝥蝥巨虛。文豹隱霧於崖谷。白虎
嘯風而負隅。萬萬操管於幽峪。射干跳伏而避無。又
有獫狁騰捷于林莽。飛颺垂鳶而捕雀。遊鷗跋跋于
盤磴。鷹鵠奮翅而莫搏。異鳥回翔而擇木。猛獸陸梁
以趨壑。易貊分形牢落。暈散而驚符。河則州浮鴻雁
歸鳧之鳥。渚戲鯢鱈鯉鱣。鱣鱣之魚。汀萋萋而

蘭芷。洎蓬葦而葦蒲。野則樅栝櫻梓。紫榆白楊。檀梗
楓楸。赤栢甘棠。蓊慘菱藿。蔚乎千章。其離離者。則有
真定之梨。信都之棗。固安之栗。清流之稻。秦實胡桃。
花紅蘋婆。海東青翠。朱實垂柯。其駢駢者。則青驄獅
子。赤汗玉駟。驕驪駉。驪駉駉。奔紅騰黃。擁甲鳴
鑣。其蔚蔚者。則石菌天花。蔓荆葳蕤。菅蒯荔芡。荷臺
婆娑。玉芻懷羊。莽蓐瀾臯。其瑩瑩者。則丹錫位精。赭
磁水晶。紫斑礬絲。玉砂鉄銀。位滋素液。累井鹽冰。薊
門石鼓。援桴而若擊。玉田白璧。誌柱而難名。其間玉
泉之流。瀦爲西湖。則芰荷十里。隱映天光。菱花當鏡。
芡寔蓮房。翠浪渺渺。錦纜牙樯。芙蓉曲島。秔稻凌塘。
室通鮫女。宮浸梵王。沙禽水鳥之翔集。遊鱗唼藻而

徜徉宛都邑之瀛洲。逼南國之湖湘。數澤之滙。別爲
南海。則域獸有垣。按鷹有臺。蔬果蕃蕪。碧樹縈迴。狐
兔之所奔走。麋鹿之所駭駘。樓煩彎弓而莫發。俠客
控騎而相猜。兕虺驚而伏草。鳧鷖駭而毳毼。湫上林
于莫數。蓋視雲夢爲瓶罌。八荒貢賦。四通而達。其南
則南金赤玉。珠貝珊瑚。駭雞火齊。琳瑯昆吾。庶土百
珍。集于天都。越羅吳錦。三壤之租。千艘萬艦。達于張
灣之瀘。其西則球琳琅玕。熊羆織皮。碑磔鏐鉄。璚璚
甌甌。大宛名馬。菟醬蟾酥。干輪萬穀。屯于張掖之郭。
其東則銀貂白狐之裘。海豹位獺之革。果下青驄。朝
鮮弧護。來于薊門之磧。其北則氍毹裘皮革。駿馬海青。
韓盧駱駝。獬貉黃鼯。度于居庸之陁。夫寶土者物寶。

物者民寶。民者國寶。國者人故。形勢強幹而匪本。賦
產外腴而非真。伊都邑之赫奕。繇人物之駢臻。故古
稱幽并。多感慨豪傑之士。石沈鷲文雅之名。伯桃併
糧而濟友。劉沈重遠而薦明。則女生之風。近諸古也。
綱成卻應而相秦。蒯徹用信而下齊。則弘辨之雄。冠
于時也。晚見而速成者。徐樂之說行也。遮道而願留
者。寇恂之才厚也。蓋延圖形於雲臺。盧植養晦于上
谷。佐漢于流離者。賴張飛之義勇。韓普于丕盈者。繇
張華之盡鞠。盧位雋首于北海。弘策制勝于建康。則
文學酬策之雄。莫能方也。照鄰列名于四傑。盧鴻擅
芳于五盧。則詞藻節槩之流。無以踰也。崇文破蜀以
典唐。劉蕡正對而落第。則武畧直言之磊磊者也。趙

趙普相宋以平遵晦鎮邊以服遠則沈畧弘度之卓
卓者也。呂端處大而不塗世傑臨危而罔變則弘亮
忠節之耿耿者也。他如知古張儉之在遼企先韓昉
之仕金天麟天倪之佐元圖事揆策各盡其能上觀
于古下逮于今既強且勝既庶且殷勇者不乏賢者
如林強不在勢力不在黔得人以塞重譯奉琛奎壁
旅平箕尾王氣浮于析津自靖難于南邦復親幸而
北巡相厥土為天室用改營為紫宸距雄關以四周
時高臺而陞臨于是爰謀厥衆僉云其良卜諸龜蓍
協兆允臧既幽明之同孚乃籌度乎短長始自南而
北伐恢中宇之神州繼定都以控朔較殷遷而遠猷
若之宏偉自文帝以規方商典約以析中往南

都而為量載觀其外雉堞倚角業業巍巍迥觀其中
甲開雜沓翼翼鞞鞞通九門以輻輳危萬第而依依
營賓館于干坊開廛市于九圍聚百貨於通闥商賈
貿而紛紜闐闐設以周旋質劑平而罔違散則衛營
星布而閑以鉤陳繞則府部峽峙而附以蘭綺爾乃
崇廣宇以九筵狀龍巖于不周架長虹于碧水若蒼
壑之騰虬立天柱以表日曉闐闐以立翠端紫宮而
崔嵬架瓊閣而雲浮衆增城以回截比金鏞而相伴
龍首齊而涌露雲雀矯而踞堯俯太行而結構凌太
虛以呬嶮內則文華罔下于下堂謹身寔陋乎宣室
昭和若邁于長年神仙不及于崇智朱鳥匪耀于承
光麒麟豈瑞于無逸奉先時勤乎駿奔欽天儼臨乎

上帝。曾敬孝。勤肅之煌煌。匪傾宮瑤室之爲麗。于後
則閣道穹窿。掖庭披瓌。瑩若朝霞之流盈。髮若佖雲
之舒霓。欒櫺疊旋而錦布。壺術幽闈而若迷。戶萬門
于。永蒼重闈。倚窳窳而眇然。撫珍樹而猗猗。惟保真
于温室。乃西南其戶相。若蕊宮之璀璨。絡珠玉而火
齊。圖雲物而變化。畫仙靈而披離。又其西。則太液涵
玉波而蕩漾。春雲繚瓊島而幻奇。海屋渠渠而隱鱗。
廣寒擁碧而倒垂。青馥芬芬而含翠。寶月溶溶以獻
卮。錦芳臨沚而湛綠。玉螭跨石以飲涓。雜芰荷以游
泳。潭魚鳥之忘機。天子雍穆。與時咸和。於茲清暑。遂
卽素波。飛彩鷁以輕颺。垂翟葆而婆娑。建羽旗以搖
曳。恍溯洄于銀河。或齊槐女。或縱權歌。優遊容與。載
咏載哦。亶瀛洲之蓬島。奚羨月殿之遊遨。乃聖王之
偕物。調玉燭而陶陶。又其池之北。有萬歲之危峯。凌
霄漢而隱闕。烟樹靄而蒼濛。又其峯之北。有海子之
汪洪。望之若江鄉之渺渺。涵之乃樓閣之重重。是又
世外之佳境。曼塵宇於閭闔者也。爾其大則築四郊
以分祀。通天地之神明。重則建九廟以追遠。格祖考
之精英。急則亭鞠風以親籍。躬勸稼以叩解。要則開
繭宮以視練。臨蠶館以勸墾。重則宸皇史以崇錄。鑑
萬世以守盈。斯皆修累朝之曠典。補周儀而後增。破
迂儒之沉惑。正舛廢于再清。乃躬修位默。夙夜踧踖。
戒虎賁以清道。驅徒卒以除闕。乃召宗伯。酌儀損益。
乃論太常。修樂祝冊。乃命御史。省牲視帛。以嚴褻數。

乃命郎將列屯布營以森戈戟。至日乘玉輦駕蒼龍
冠通天以崔嵬服袞袞而穆雍。執蒼璧對蒼穹。奏鈞
天擊圓鐘。終九成而協律。舞八佾而翮愷。儼天帝之
歆隆。臨瓊臺而冲冲。柴既燔而神格。乃回鑾于紫宮。
慶大禮之有成。謙羣僚而融融。伊方澤之將事。儀少
變而齊同。既祀四郊。乃崇六典。當陽春之載熙。觀百
卉之蔓衍。召農官以備耒。戒田夫以修畎。思無逸之
攸重。爰命駕以乘輦。值馮相之卜吉。靈威首于芟剪。
呼攝提以先驅。奔豐隆爲後殿。介士鳴鉦而建鉞。虎
旅冠鷄而執戴。導被繡之聲髦。駙蒲梢而張幟。萬騎
雲擁而分布。千師交戈而橫擗。于是登龍輅植雲旗。
紆皇祖佩玉螭。青屋列于原野。朱旂揚于郊疇。田峻

懽騰而介馭。農正隄祀而三招。始天田之苾苾。忽禾
黍以離離。酌勤惰而勸錫。感萬姓而盱嬉。咸山呼以
鼓舞。乃擊缶而力村。歌幽風以環駕。亶追邁于皇羲。
觀萬民之樂業。與輔臣而賡歌。分春醴以其飲。元老
霑而若醑。據耳之深。鬢首之豪。舉和鞞。鞞之韵而謳。
韎昧以陶陶。相與娛于化日。騁躡舞以相高。于是皇
輿返轡。駐于西苑。喜蠶事之方殷。命后妃而釋珣。且
從事于柔室。伺三眠而罔宴。天妃先效。正親緣諸嬪。
肅肅而歛繭。慕姬姜之儉修。脫昭陽之婉孌。斯德化
于掖庭。而禮繼于丕顯。爾乃粢盛親蒞。祭服親織。誠
已洽于神明。胡饗祀而莫卽。神人協和。軌度罔忒。舉
于九重。刑于萬國。一時聿新。千載作則。旣月乃吉。辟

雍寔臨釋菜先師黌宮寔升徹聖像以破謬崇正學
以還淳進司成以論道何會裂而統真環經生以拱
德信帝王之學與韋布而罔倫既乃靜修天室時幸
文華開經筵以進講列學士而搜遐探真腴于簡逸
測淵海于津涯延輔臣以諮問若憲老而罔加爾其
九重拱乎堯舜八座列乎臯夔禮行而民章樂備而
物怡仁風拂而遐荒溢化日長而幽谷曦天子方崇
文黜不事武奇誠以憲祖藉以偕時與民唯唯與物
熙熙遊佃射獵之好不騁吞刀吐火之伎罔施沙棠
木蘭之舟弗制魚龍角觝之戲奚馳于是黃河清甘
零凝白兔皎皎白雀來庭白鹿呦呦百鹿是絝德洽
兩儀瑞應千禎聖王罔以爲靈 卍加志手持盈春秋

代而彌隆遐邇渥而益蒸既賞賜乎農扈乃勞賞乎
車從薄五甲平三令麾騎士而進弓聊樹表而小畷
授鉦鼓而控驄示以陣形節以軍容牙旗分布于鳥
雲勢分鵝鶴而乘風蒲且滿穀而不發樓煩挾矢而
窺掖上將披驥而仰視倏鳴鏑而墜雙鴻遂命解罟
弛畧撤隊回騎效三驅以成禮不剪羽以窮奇慕太
乙之二而懷萬物以化齊且歸來乎履吉迓滋至之
天休爲無爲而德湛與黃軒以優游是故仁無不懷
德無不柔文教與位風而並翔至化與大造而嘿遊
太階平于八表玉宇涵乎九州稟登三而成五孰云
遐遠而莫可以匹儔况九廟郊陵之建匪若阿房之
事遊觀謁陵恭祀之巡匪若上林之縱射獵蓋王者

之典咸備惟聖人異世而合轍將使煥乎其有章而
陋百代于罔軼彼螻蟻之云何抑齷齪於儉嗇由是
觀之則地勝者居皇聖國寔者多賢良兼東西與中
都而並較猶未若茲土之無量然則宜奕世之神脩
咸作京而坐朝堂者也

兩京賦

盛時泰北京賦巍巍燕都冀州之紘分在尾箕析木
之精入燕朝以建土肇丕迹于位軸呈默運以持衡
屋潛祈而兆域紫微韜約以合輝太乙翕書而拱率
故望氣者跋踏輪惻命卜者屏營掩祝蓋嘗覽夫形
勝總環瀛之要害抗萬堙而建瓴在高辛之逃世已
昉號乎幽陵及下迨于軒轅戰蚩尤而底平虞夏商
湯易稱朔方武封堯後以薊爲疆召公起燕藩屏用

昌自秦漢而郡縣歷晉唐之雲擾寔恭待乎宏造邈
惟南征鞠旅而踐旣正厥稱郡畿允莫定理條疆分
途異縣配南都肇北京納儒臣之懇請設行部之新
名易順天之崇號應大興之符稱于是丕蹟闕開前
後擁倚樹疆表表聯環並峙左右起伏蟲幄連起建
學校新官囿文武錯列輞分輻輳規肖矩傲視南益
詳街衢巷衢宮宇橋梁闐闐市廛翼接鱗翔塚廟庭
宇古今萃藏將以猷歲躬受方賀肆赦蠲罪蘇奸釋
過忻兩都之並錯措天下于一家商邑翼而靡頌周
京頌而匪誇沛遐惠于四埏遂都民之樂康給農器
于遠路用樹植乎農桑載男耕而女織混樂土之相
望忻漕運之廣濟儲邊嶠之艱根貴竹貢而置輔交

趾悚其內降伊於歌而管誦抑濟濟以踰滄遂因官
而論次偉羣績之恢張海宇顛其再輯黎庶被以重
光覃疏流于外國咸矯首以來王大巖山呼騶虞麒
麟野蚕作繭佻兎來馴嘉禾屢穗海宇和平黎庶鞠
育忻然如春于是郤封禪之請謝金火之毋毀方秘
之譎賜免書之緘集儒臣纂經史詮六經之要道覈
千古之精理罷滄溟之轉運藩郊圻之牧圉因特屢
登大敞鰲山宴輔弼以既醉沛醕澤之弘寬製新曲
以示藻又大惠乎鏹函及乎午日乃遊東苑觀毬作
塲視射成讌車騎集韃橐韜萬柳偃旂旂高賦聲詩
以紀權永昭示于寰縹念烽火之未靖久爲患乎邊
城時跳梁而躑躅敢窺覲以橫行憫生民之被禍將

大肆乎遠征嚴威迅發萬輿遙啟大漠荒埽開營疊
壘迅刺擊之猛利乃奏凱歌擁衆以旋塵凝警謐威
聲四延北斗南瞻清泉神應繼統承緒端拱垂裳致
海宇之寧謐降渥惠於四方自乾清御皇極建九旂
臨萬國雞人未唱擊鼓定時銅符初闕魚鑰扃匙宿
衛紛其未散羽衣聳以來齊南象導路誕馬引虓豹
馬在後森列徘徊玉節止肅寶纛未威黃旄絳旛旋
繞相隨班劍儼其冰雪儀刀凜其鏦鏦羽葆團以婉
轉金鉞耀以菁葱團扇紛其掩映曲繖屈以從容龍
戟列而如迅熊旗繞而縱橫大駕將陟武備后列丹
陛之駕馬步之輦玉輅大輅于于焉簇簇焉雲蒸而
霧繞者不可仰覲于是司隸稱警鳴以條狼凜內外

之井然人持水而沃湯鴻臚傳唱萬方畢集宗伯捧
函嵩呼海溢聳天地之高厚忻日月之朗光見蟬貂
之濟簇擁環之鏗鏘既伏拜而舞蹈又頡頏而翺
翺聳蹠跚而休惕見萬疊之翕張垣墉峻峙匝亘凌
兢聳翔窮赫奕嶮峻增聳金被錦圖丹見青色煜煜
而成紫又雪灼以爲黃或燦燦以爲赤抑燿燿以成
光肆采恩之四繞羗施晶之焯焯階盤旋而自轉橋
轟抗以回杭廟婉透而散陟戶鴻洞以崇祥石瑩明
而若琢甃平直其似霜堊烜赫其勝霰粉哲白其若
瑒棟陸聳其上仰梁嵯峨其橫當紛海藻以爲飾盤
龍珠以吐光豈僂般之人巧殆雷電之天丁屯紫螭
于刻桷盤赤騰于雕楹虹揚眉以指棟鵬矯翼而飛

霓綺葩吐乎邃井渥彩爛于疎櫺絳霞影于網戶金
雀棲乎觚稜儼軼翹而下啄疑軒揭而將騰爾其華
蓋承宇亘中直連謹身後接邃密艷演午門端門承
天大門層列叠拱窳窳崢嶸順掖之啟左右峻嶒東
西華角並帶同橫立瓊樓于兩傍分文武而各馳錯
諸彩以掩映築峻墻以爲基列御道以中敞紛左右
以爲墀列直廬于其外見拼欄之對起躡玉喬之長
虹湛瓊楹于金水接萬拱之窳瓦騰重簷而複宇東
有文華扈以文淵西有武英嶽竄騰蹇太廟齋宮對
聯社稷廟街社街繩平砥直隆宗景運月華日精椒
房椒風六宮安貞賁庸蒿柱黼帳藻扇叠複道于雲
表比鱗瓦而建聰訝晨輝之閃雪映旭日以上昇於

是祝萬壽祈帝福禾羣方澤四國錫岡陵同覆育紛
拜舞躬踏肅繪振羽衣屏褱襪跟蹠顛翹同忻大
造矚虎豹之欄檻見駝犀之胃腳驚麋鹿之餐萃駭
麋兎之狂躍仰睠眄而俯興望翠華之拱翼雜輝煌
以奔趨隨玕玲而緩曳悚玉笋之嵯峨仰石獅之凜
慄陟銅山以跋踣渺金河之滔疾天子方且肅朝覲
之儀明賞罰之典大黜陟之公重祖宗之憲嚴邊防
置京儲督漕運謹市虞罷遊讌御講筵日淵嘿之燕
居豈輕輪之暫旋凡諸可遊矚以備一時之旋駐者
莫不扃金鑰以鐫封合魚符而不啟恣草木之叢茂
任禽鳥之泳徙岵岵凹凸蟲虻齧齧樛葛蔚蒼苔封
蔓絡複磴洞巖豁開磊落達道委而暫閑駟馬停而

不駕玉螭峙以拱護金鰲萃以孤鶩堆雲凝而不流
積翠高以生寒瓊華容其閭窳承光艷以回環嶺寒
虛其輪菌飛嶂戢以羽翰雖玉泉之縈抱亦沂水之
空潺蒲葦蒹葭菱藕雕胡鱗游介泳任其自如于是
散步環樂觀于列署則隨長安之左右列文武之戔
廬表裏森其對峙咸拱繞而扶疏擁前后而聳列環
玉河之通渠見左右之並置亦遠近之聯裾仰以恣
乎周典俯以效乎商模列六卿于左省建五軍于右
隅院以玉堂爲署寺以奉常爲胥醫藥星曆太僕鴻
臚縣隨府而遠控備輿學而各分內給各衛外總諸
營繞龍蘇之精鏡簡戈鋌之旗旌置給舍于廊廡帶
太學于墀闕闕九門之通衢週里回之四十峙萬雉

于千層若縱橫而曲直前列其奇后峙以偶左右並
聯各互爲柵鎮以重樓壓以飛甍叠甃壘以曲檻互
欄楯以相通跋蹬苑轉睥睨蔽空廬舍巡演濠潢溪
崇開洞備其卒急魚鑰可以晨曠抱關察其馳駟衝
衝貫其四衝乃有九衢往涉輿馬肆雄沙堤平以曲
折昏曉湧其成萊市肆星羅恣人耽坑橋梁濟顛萬
邦酬秀水蚕作繭雪鼠成絲火洗爲蛟龍織鬣番
絨蜀錦烏連越絺海陸俱腆草蕨咸奇伎藝精工戎
裘各宜酒汗則帷幙生飈摩肩則海濤成壑呵氣則
鬚柱消冰轉日則睨光迅電誠鋪集之盛區乃閭閻
之美翫廓廓新築用衛閭閻乃環旋以拱護益永壯
乎神京立七門以便出增崔嵬以岫崕路蹙蹙以敞

遂勢陡峻以峻增設壘礮以作衛儼電擊而雷轟前
恢日行后奠彌阮豈漫作之是翫寔貽世以康寧益
嘗總而論之邇畿甸遠京輔內都邑外荒服雖古昔
之攸同維茲地之獨武近則倚昌平以爲脊敞范陽
以爲胷聯山海以爲帶擁上谷以爲屏唯玉河之澄
澈貫周廻以爲經若諸水之蓄洩視高下以流汎百
泉湧派而穴漩孔汭垂于深谷遠則據嶽鎮之中
軸勾東西之勢雄西以華山爲虎東以秦岱爲龍南
岳南鎮益遠益隆五嶺作案于嶺表江河襟帶而朝
宗展明堂于奧海拱朝拜于羣峰以此而較往昔儔
堪與之比崇自洪濛之初闢奠河山以爲界天勢崇
于北極地維虛于南蓋引日星以上騰導江河而下

派法天明以居高控地維而作帶故南北之相望誠
控馭之雄槩昔姬周之豐鎬每侈詠於詩書豐距鎬
而一水又何有于雄圖况嬴秦與劉漢奚敢論乎訐
謨若嗣此之鼎建成分集于一隅雖迭興于前世誠
遠讓乎雄紆故散如布棊聚如運掌分列省以成疆
合連襟而成襁如堂視地類脛走項誠高厚之拮据
乃金湯之修攘方輿如此是以足尙若夫土風則稟
樸茂之淳資賦勁勇之正性豪傑挺生勳庸克靖朗
烈悲歌沉鷲鎮靜文雅寬舒傲宕平定至于民俗尤
爲繁富財貨克溢四方罕覩以糴獵爲輕肥耽韜橐
爲雄武出則輜帷高騫遊則金翠如堵人幕面而障
塵士垂綃而避土或睚眦以報仇抑椎擊而作旅通
名姓于禁中任榮枯于吹詡惟僭侈之是營豈禮法
之可阻司察避其昏酣乘驄難其羣伍晨鬪雞于廣
陌暮躍馬于深聚蹴鞠則千里爲羣鳴鏑則飛走成
府詎貴璫于要津亦近戚與雄族任俠者履不容旋
鼓篋者車不停軸忻剋蓋之續紘總邸舍之填簇節
序則時當寅令賀正爲始彩燕爲簪春盤成俎祠太
乙禁火炬春序將遄墓祭成侶逢午散騎置巧陳瓜
騁望郊垆乞巧天娃因陽九而登高爲冬朔而設炭
忻長至之屆臨喜陽生于一線迎臘祀竈驅儼設宴
看水池于署官欲蕃育乎鷺鴈雖舊俗之可傳亦真
贗之難辨棄衣麋以送窮燎草竹以成薦本度朔以
畫桃因除虛而設奠若日忌與月惡亦隨方而異宜

總四時之令氣合四方之所奇風霾則塵沙曉霖
雨則阡陌成泥雪落則皸瘃裂掌冰結則柱蠹如旗
以臺榭爲登陟用苑圃爲陂池因御術爲環繞庸沙
渚爲藩籬雜坊市而其處隨冠笄而相嬉五陵讓其
豪俠四姓失其光儀地土山藪厥類寡繁擾重甲於
四方菓蓏疏其援植虎刺班于楹桴蘋婆甘于來禽
朱櫻素奈香水黑苓桃李梅杏安榴丹榘黃芽赤根
石菌天花蕪菁薯蓬蓼薑茄瓜薑芥蘆蕪水蘇韭芽
欺江南之蓴菜邁南國之鮮蝦列於一市山獾海獺
原貂隰楚姑畧不言用戒登俎唯有人才世所軒軼
三代而后七雄爲烈二京三國扶剛抗節左羊而後
代有其傑樂毅以寸書報燕荆卿以匕首泣血田光

以刎頸寔交蔡澤以片言取捷河間以被服擬儒中
山以間樂遜德神佛方伎殆難指陳至於古蹟惜多
湮淪遺故都于軒轅指孤竹之令聞悲廢宮于碣石
想寧臺於荒荆雖巨公之學所亦秦莽而沉淪獨于
鬱之釣臺猶稱名於花村雖有深谷伊誰生黍雖有
甫田伊誰種玉徒紅螺之吐光空青蛇之應祝變幻
無常雜杳難述故自薄海內外綱目定較如畫一
整肅嚴翼天旋地靜垂萬斯年金甌罔競勝周營洛
邁漢作京視唐已拓較宋寔宏建帝王之全業成創
守之令聲合天維之四時盡地埏之八瀛蓋萬世而
永寧也二京賦

昆田謹按余古峯盛雲浦二賦文不足存慮

博聞者以爲絀漏故節錄之

陳敬宗北京賦惟聖皇之建北京也紹高帝之鴻業
啟龍潛之舊邦廓天地以宏規順陰陽而向方準四
裔以布維揭八表而提綱粲星分於箕宿映黃道之
開張壯天險於居庸亘重關於太行會百川於遼海
環河岳於封疆拱北辰兮帝居陋葦固於金湯均萬
國兮會同而適居天下之中央也於是頌綸音建皇
極布深恩施廣澤捐內帑之金錢出天府之玉帛資
工垂錫匠石懽聲傳衆奔走萬國雷動雲興紛紜紉
繹忻怵踴躍各供厥職遂選材而度物資百神以興
集魁奇挺拔千仞之名材五色五采希世之珍特輦
載勞午舟運克斥紛河輪而海會肆丘蘊而山積爾

初建五峯八亭章宗屢游之常題詩刻石今亡矣惟
二碾藥鐵輪尚存又有學士劉定之記絕頂曰蓮花峯
有舍利塔右一峯爲筆架峯八亭惟列宿招涼可記餘
俱未雅馴長安可游記

趙孟頫仰山棲隱寺滿禪師道行碑記畧曰師名行
滿字萬山俗姓曾氏其先出東魯曾子後祖仕江右
遂爲太和人至元庚辰至仰山有會心處遂留薙髮
禮澤菴爲師更今名又叅學四方雲門臨濟皆得其
髓大德癸卯仰山學者請師歸舊隱聲聞大振梵僧
宣政使相迦失里功德使大司輦眞吃刺思相慕爲
道友武宗在北邊下令施鈔萬貫造文殊菩薩像思
幸其寺施金百兩銀五百兩鈔六萬貫賜號佛慧鏡

智普照大禪師勅尚方造織成金龍錦緣僧伽大衣
窮工極巧經歲乃成命有司作尊勝塔於東嶺及建
明遠觀光二亭以備臨幸蓋棲隱寺始建於遼至師
爲二十六代云銘曰峩峩仰山如青蓮華中有寶坊
古佛之家天王衛門地神扶棟參差珠閣葳蕤金鳳
鬱鬱青松羅蒼玉林清風過之振海潮音住此山中
有大禪老宴處寂靜萬緣皆了師以佛心爲國回嚮
寫恒河沙功德無量

松雪齋集

北京仰山寺有姚少師畫像自贊其上云這箇禿厮忒
無仁聞名垂千古不值半支

郊亭詩話

吳寬仰山寺觀姚少師像詩城裏僧廬揭仰山姚公
於此昔投閒顧瞻圖畫長廊外拂拭塵埃破壁間困

萬兮熊羆維方叔兮召虎蘊謀畧兮神奇聯金貂與
玉蟬紛舄奕而光輝雜冠珮兮趨鏘蔚百司兮威儀
各攄忠兮獻納亦覃慮而論思天官之明衡鑑司徒
之謹度支宗伯之修禮樂司馬之整六師秋官之邦
刑是慎司空之百工惟時萃僚濟濟各謹攸司大小
率職庶績咸熙其後則有太液之池萬歲之山琪樹
敷榮金芝芳妍翼鳳飛兮絕巘波龍鱗兮澄瀾聳靈
峯於天上流惠澤於人間其右則乾清坤寧之宮太
乙紫微之所壯皇居於九重肅勾陳兮天府若夫蓬
萊方丈之神區閭苑瀛州之仙宇臣寔昧於見聞不
可得而殫數其左則爲文華之殿鶴禁宮玉葉金
枝儲副是崇講道育德惟孝與忠體文王之三朝謹

視膳之禮容又其左則有石渠天祿之閣金馬玉堂
之署濟濟逢掖峩峩章甫講說六經之言談論羣書
之語斟酌禮樂之文涵泳仁義之府莫不欲笙鏞乎
治道黼黻乎皇度至若靈囿之所蓄亦雜沓而紛綸
麒麟之振振騶虞之霏霏白象之瑩潔如雪金猊之
威猛如神顯靈姿於龍馬逞奇文於福鹿絢綵霞於
丹鳳脰玄兕於蒼玉鸚鵡之色維黃素烏之質耀霜
紛珍異之炳煥咸獻瑞而呈祥他若內藏寶貨之克
金玉珠貝之富象犀虎豹之雄驪騮騏驎之庶國家
富有萬國茲固瓊瑣不足數也其外則都城列兮萬
雉開十二兮通衢蔚那畿兮千里比百萬兮民居接
棟連薨溢郭填郭藹藹鬱鬱密而不疏邑里錯分別


遂分區四民樂業室家歡娛農務乎耕桑士究乎詩
書維工及賈懋遷有無百寶之所克斥百器之所崇
積粲金珠兮列肆聯珠綺兮阡陌珊瑚琳琅璀璨赫
奕飛鳶棟兮綵鳧藹王侯兮第宅填車馬於闐闐紛
雜沓而絡繹喧舞榭與歌樓樂鐘鼓兮斯夕載瞻辟
雍學宮迺透穆穆乎宣聖之廟肅肅乎羣賢之祠崇
祀有典釋奠有儀歌棫櫟以作人偉髦士之攸宜贊
朝廷之禮樂炳道德之光輝於是經營既終厥功告
成方青陽兮屆辰逢吉日於元正於時萬象維新三
光以明麗慶雲於璇霄燭祥光於太清皇上服袞衣
乘鑾輅設警蹕陳鹵簿翠華歲蕤颺雲飄霧縈精誠
寡思慮奏雅樂諧詔濩謁郊廟告太祖香苾芬其上

升靈昭昭兮來下眷盼蠻兮方集綏萬福兮純嘏於
是升金根旋太常御正殿開明堂朝百官臨萬方會
諸侯陳玉帛旌淑慝明黜陟然後布德和令行慶施
惠錫高年兮上尊進賢達於庶位敦唐虞之道德厚
湯武之仁義興三代之禮樂黜漢唐之功利炳玉燭
調元氣協重明於日月侔化工於天地使九州八荒
含齒戴角之羣四方萬國懷仁負義之士莫不熙熙
皞皞於泰和仁壽之域仰事俯育於漸磨涵煦之內
此誠所謂恢鴻業於千古開太平於萬世際輿圖而
覆載大一統而無外也是知國家萬萬年隆盛之慶
皇上萬萬年高厚之壽聖子神孫萬萬年無窮之祚
蓋與天地同爲悠久也

澹然居士集

嘉祐五年五月西上閣門使英州刺史郭諮上平燕議
曰契丹之地自瓦橋至古北口地狹民少自古北口至
京屬奚契丹自中京至慶州道旁纔七百餘家蓋契丹
疆土雖廣人馬至少儻或南牧必率高麗渤海達靼黑
水女真室韋等國會戰其來旣遠其糧匱乏臣聞以近
待遠以佚待勞以飽待饑用兵之善計又聞得敵自至
者勝先據便地者佚以臣所見請舉慶曆之策合衆河
於塘泊之北界以限戎馬然後以景德故事頓兵自守
步卒十二萬騎卒三萬強壯二萬歲計糧餉百八十三
萬六千斛又旁河郡邑可由水運以給保州然後以拒
車馬三千陷馬槍千五百獨轅弩二萬分選五將臣可
以備其一來則戰去則勿追幽州糧儲旣少契丹不可

久留不半年間當遁沙漠則進兵斷北口塞松亭關
傳檄幽薊燕南自定矣



日下舊聞卷三

室一 憲 金

遼以幽州為南京宮之扁曰永興曰積慶曰延昌曰章
敏曰長寧曰崇德曰興聖曰敦睦曰永昌曰延慶曰長
春曰太和曰延和殿之扁曰清涼曰元和曰嘉寧堂之
扁曰天膳樓之扁曰五花曰五鳳曰迎月閣之扁曰乾
文門之扁曰元和曰南端曰萬春曰千秋曰鳳凰園曰
柳園 禁扁

按遼以天顯三年升東平郡為南京本治遼
陽至會同元年始以幽州為南京

南京析津府城方三十六里崇三丈衡廣一丈五尺敵
樓戰櫓具八門東曰安東迎春南曰開陽丹鳳西曰顯

西清普北曰通天拱辰大內在西南隅皇城內有景宗
聖宗御容殿殿東曰宣和南曰大內內門曰宣教外三
門曰南端左掖右掖門有樓閣毬場在其南東爲永平
館皇城西門曰顯西設而不開北曰子北西城巔有涼
殿東北隅有燕角樓坊市廨舍寺觀蓋不勝書其外有
居庸松亭榆林之關古北之口桑乾河高粱河石子河
大安山燕山中有瑤瓊遼史
度盧溝河六十里至幽州號燕京子城就羅郭西南爲
之正南曰啟夏門內有元和殿東門曰宣和城中坊閭
皆有樓南門外有于越王解爲宴集之所門外永平館
舊名謁石館清和後易之南卽桑乾河王沂公上契丹
事

按遼史皇族表有于越轄底于越喝魯于越
洼于越休哥于越魯不古于越高于于越
質國語解于越貴官無斤職其位居北南八

王上

南京宮衛曰弘義宮曰長寧宮曰永興宮曰積慶宮曰
延昌宮曰彰愍宮曰崇德宮曰興聖宮曰延慶宮曰敦
睦宮曰文忠王府各置提轄司遼史

太宗會同元年十一月詔升幽州爲南京三年四月庚
子至燕駕入自拱辰門御元和殿行入閣禮十二月詔
燕京皇城西南堞建涼殿會同七年二月幸長春宮十
三年正月如長春宮十五年二月朔如長春宮同上
遼有二長春宮一在南京一在長春州五年三月朔

幸長春宮賞花釣魚十二年三月如長春宮觀牡丹十
七年正月朔如長春宮則非南京之長春宮也 北平古
今記

景宗保寧五年春正月御五鳳樓觀燈聖宗統和二十
四年八月改南京宮宣教門爲元和外三門爲南端左
掖門爲萬春右掖門爲千秋開泰五年駐蹕南京幸內
果園宴京民聚觀求進士得七十二人命試詩第其工
拙以張昱等一十四人爲太子校書郎韓亦士等五十
八人爲崇文館校書郎燕民以車駕臨幸爭以上物來
獻上賜脯飲至夕六街燈火如書士庶嬉遊上亦微行
觀之興宗重熙五年詔修南京宮闕府署九月獵黃花
山獲熊三十六冬十月幸南京御元和殿以日射三十

六熊賦幸燕詩試進士於延道宗清寧五年八月命有
司撰太宗神功碑立於南京十月朔幸南京祭典宗於
嘉寧殿 遼史

太宗以燕城北有市百物山侍命有司治其征 同上
契丹待南使樂列三百餘人舞者更無回旋止於頓挫
伸縮手足而已 畫樓錄

遼曲宴宋使酒一行威儀起歌酒三行手伎人酒四行
琵琶獨彈然後食人雜劇進繼以吹笙彈箏歌擊架樂
角觥王介甫詩涿州沙上飲盤桓看舞春風小契丹益
紀其事也至范致能北使有鷓鴣天詞亦云休舞銀貂
小契丹滿堂賓客盡關山則金源燕賓或襲爲故事未
可定耳 涿水亭雜識

章頻使契丹至紫濛館卒契丹遣內使就館奠祭命接
伴副使護其喪以錦車駕橐駝載至中京又具鼓吹羽
葆吏士持甲兵衛送至白溝宋史

按韓魏公安陽集有奉使過紫濛遇風詩元
混一方輿勝覽載人大輿府今莫詳其處矣

金以幽州爲中都汴爲南京宮之扁曰啟慶曰衍慶曰
聖壽曰翠微曰慶寧曰景明曰坤寧曰光春曰萬寧曰
磐寧曰壽康曰仁壽曰隆慶曰壽安曰長春曰建春曰
興德曰慶元曰光興曰孝寧曰壽聖曰集慶曰坤儀曰
會聖苑之扁曰瓊林園之扁曰慶樂曰熙春曰同樂曰
東明曰東翠院之扁曰蓬萊曰宣徽殿之扁曰長樂曰
長生曰浮生曰仁安曰仁智曰仁政曰保安曰保成曰

洪政曰大安曰大慶曰崇慶曰廣寒曰廣德曰廣仁曰
瓊光曰隆德曰瀛洲曰重光曰厚德曰天興曰樞光曰
光德曰光興曰集英曰明俊曰熙春曰集賢曰明揚曰
慶春曰泰和曰純和曰慶和曰太和曰德和曰元和曰
魚藻曰德昌曰福寧曰燕壽曰德壽曰福壽曰端儀曰
德儀曰徽音曰常武曰揚武曰閔武曰臨武曰聖武曰
皇武曰文明曰芳明曰承明曰文昭曰乾元曰承華曰
臨芳曰貞元曰宣華曰慈訓曰絳霄曰蓬萊曰睿思曰
翠霄曰寧福曰紫宸曰奉慈曰湧金曰儀宸曰孝慈曰
玉清曰神龍曰丕承曰景祥曰清暉曰辰居亭之扁曰
雪香曰瓊香曰臨漪樓之扁曰嘉福曰嘉瑞曰丹鳳曰
瑞雲曰瑞光閣之扁曰芳華曰景福曰燕昌曰光昭曰

清徽曰翠微曰蓬萊曰瓊華館之扁曰會同曰歸仁曰
同文曰思華曰粲文曰來寧曰來同曰懷德曰肅儀司
之扁曰侍儀嶼曰瀛嶼曰瓊花池曰龍游曰浮碧門
之扁曰宣和曰啟夏曰豐宜曰丹鳳曰大慶曰承天曰
日精日月華曰左右昇平曰左右昇龍曰隆德曰嚴祇
曰繁禧曰安泰曰祇肅曰安貞曰南薰曰大典曰大安
曰南順曰順陽曰西會曰仁安曰德和曰德昌曰文明
曰光輿曰啟慶曰明昌曰徽音曰光翼曰宣陽曰光牒
曰宣華曰玉華曰應天曰嘉會曰宣曜曰陽春曰施仁
曰灑華曰麗澤曰彰義曰景風曰端禮曰通元曰會城
曰崇智觀之扁曰西涼曰黃輿禁扁
都城四圍凡七十五里城門十二每一面分三門其正

門四傍又設兩門正東曰宣曜陽春施仁正西曰灑華
麗澤彰義正南曰豐宜景風端禮正北曰通元會城崇
智此四城十二門也大金國志

按金史城門十三北有四門一曰光泰當以
史為正

大定元年十一月殺英以軍至中都同知雷守璋請至
府議事殺英疑璋有謀乃陽許諾排節仗若將往者遂
率騎從出施仁門駐兵通州見世宗於三河金史列傳
泰和八年八月有虎至陽春門外駕出射獲之金史本
紀

明昌五年為壇于景風門外東南歲以立春後丑日祀
風師又為壇于端禮門外西南以立夏後申日祀雨師

是日祭雷師于位下 金史禮志

明昌六年章宗未有子尚書省臣奏行高禘之祀乃築壇于景風門外東南端地與園丘東西相望歲以春分日祀青帝伏羲氏女媧氏位壇上南向西上姜嫄簡狄位於壇之第二層東向北上前一日布神位省牲器陳御弓矢鞬于上下神位之右其齋戒奠玉幣進熟皆如大祀儀 同上

金自天德以後始有南北郊之制大定明昌其禮寢備南郊壇在豐宜門外圓壇三成成十二陛壇墻三匝四面各三門齋宮東北府庫在南壇墻皆以赤土坊之北郊方丘在通元門外方壇三成四正階方墮三周四面亦三門朝日壇曰大明在施仁門外之東南南門壇之制

皆同方丘夕月壇日夜明在華義門外之西北掘地汗之為壇其中常以冬至日合祀昊天上帝皇地祇于園丘夏至日祭皇地祇于方丘春分朝日秋分夕月 同上金太祖武元皇帝平遼碑在南城豐宜門外史臣韓昉撰文字文虛中書 金臺集

韓昉字公美燕京人天慶二年中進士第一累遷禮部尚書翰林學士兼太常卿加開府儀同三司封鄆國公善屬文最長於詔冊作太祖睿德神功碑當世稱之 金史文藝六傳

宇文虛中字叔通蜀人建炎二年為祈請使被留天眷間累官翰林學士知制誥兼太常卿封河內郡開國公書太祖睿德神功碑進階金紫光祿大夫 金史本傳

循宜泉橋北少東園內有金太祖武元皇帝碑局守嚴
秘園後有小亭四旁卉木成列峙二靈壁石於巽坤隅
燕石集

郝經戊午清明日大城南讀金太祖睿德神功碑詩
雜花裝樹燕草綠珠翠重重擁燕玉踏青車騎各一
簇巉天一碑杏稍出驪肩垂袖立馬看穹窿交龍勢
屈蟠四面渾鏤堆字山填金刻盡黑蠟斑冒頭遷史
學舜典序字班書雜文選銘章生民麗且姁太祖帝
紀都一卷初賄肅慎兆已陳日出之國生聖人周雖
舊邦命維新不事殺戮義與仁海青一翅海西落兩
國君臣俱不覺鷓鴣聲裏降王縛漢民不失生聚樂
平地突起金天龍面如紫玉真英雄化行江漢服羗

戎百年以來誇俊功參用遼宋為帝制文采風流幾
學士磊磊高文辭稱事卓冠一代誰復似汴亡文物
委地壤不收獨有此碑岌業在幽州荒煙莽蒼無人
讀使我掩面涕泗流鄭王已自磨甘露故壠移來立
新墓小民世情多忌諱更欲去除誰愛護不久拽仆
野火焚後人不復見此文攀花再讀傾一樽朗詠直
過宣陽門 陵川集

葛邏祿迺賢詩十丈豐碑勢倚空風雲猶憶下遼東
百年功業秦皇帝一代文章太史公石斷龍鱗秋雨
後苔封鰲背夕陽中行人立馬空惆悵禾黍離離滿
故宮 金臺集

燕城西南門曰端禮有大定末劉無黨所換左丞唐括

安禮碑云尹大興時迎午休吏燕雀語堂下人不知有官府

玉堂嘉話

泰和六年詔建昭烈武成王廟於闕廷之右麗澤門內

金史

郝經義勇武安王廟碑郡國州縣鄉邑閭井皆有王

廟夏五月十有三日秋九月十有三日則大為祈賽

整仗盛儀旌甲旗鼓長刀赤騾儼如王生千載之下

景嚮若是况漢季之遺民乎

陵川集

元好問梁園春詞雙鳳簫聲隔綵霞宮鶯催賞玉谿

花誰憐麗澤門邊柳瘦倚東風望翠華

遺山集

紇石烈執中分其軍為三軍由彰義門入自將一軍由

通元門入

金史列傳

大安三年二月通元門重關折九月蒙古兵至中都十

月遣泰州刺史木虎高琪屯通元門外至寧元年五月

起胡沙虎

即紇石烈執中

復為右副元帥領武衛軍三

千人屯通元門外八月胡沙虎自通元門入弑帝中都

妃嬪皆束裝至通元門

金史紀

入豐宜門過龍津橋橋分三道通用奪玉石扶闌上琢

為嬰兒狀極工巧

北轅錄

龍津橋在燕山宣陽門外以玉石為之引西山水灌其

下

石湖集

范成大詩燕石扶闌玉雪堆柳塘南北抱城廻西山

剩放龍津水畱待官軍飲馬來

同上

宮城四圍凡九里三十步自天津橋之北日宣陽門內

下

卷三

城之南門也中門繪龍兩偏繪鳳用金釘釘之上有重樓制度宏大三門並立中門惟車駕出入乃開兩偏分雙隻日開一門大金國志

泰和四年三月大風毀宣陽門鴟尾金史五行志

過宣陽門有兩樓日文日武文之轉東日來寧館武之

轉西日會同館正北日千步廊東西對焉廊之半各有

偏門西東日太廟向西日尚書省大金國志

官城之前廊東西各二百餘間分為三節節為一門金

史志

循東西御廊北行將至宮城廊即東轉又百許間其西

亦有三門門中馳道甚濶兩傍有溝上植柳廊脊背覆

以青琉璃瓦宮闕門戶即純用之攬轡錄

真元初海陵遷燕乃增廣舊廟奉遷祖宗神主於新都

三年十一月奉安于太廟大定十一年十一月郊祀前

一日享太廟有司議薦新禮正月鮓明昌州司牛魚無

則鯉代二月鴈三月韭以卵以葑四月薦水五月菡蒲

羞以含桃六月彘肉小麥仁七月嘗雛雞以黍羞以瓜

八月羞以茨以菱以栗九月嘗粟與稷羞以棗以梨十

月嘗麻與稻羞以兔十一月羞以麋十二月羞以魚金

史禮志

入宣陽門由馳道西南入會同館北據錄

會同館燕山客館也遼已有之石湖集

北即端門十一間日應天之門攬轡錄

應天門舊名通天門大定五年更金史志

應天門內城之正南門也樓高八丈四角皆垛樓瓦皆琉璃金釘朱戶五門列焉當扁惟大禮祫享則由之東西相去一里許又各設一門左曰左掖右曰右掖各有武夫守衛城之正東曰宣華門正西曰玉華門殿九重凡三十有六樓閣倍之正中位曰皇帝正位後曰皇后正位位之東曰內省西曰十六位乃妃嬪居之大金國志

明昌六年二月震應天門右鴟尾泰和八年四月宋獻韓侂胄等首于元帥府五月丁未御應天門備黃麾立仗受之金史章宗紀

貞祐元年十二月朔上御應天門詔諭軍士金史宣宗紀

鑾駕出宮前一日有司設大駕鹵簿於應天門外尚輦進玉輅於應天門內受尊號群臣次於大安門外奉迎册寶至應天門宣赦日於應天門外設香案金史禮志大定七年四月朔日食伐鼓應天門內九年八月朔日當食以雨不見伐鼓于社用幣于應天門內金史天文志

門內有左右翔龍門及日華月華門金史志皇太后册立乘輿至翔龍門金史禮志

前殿曰大安左右掖門內殿東廊曰敷德門金史志大定七年正月上服袞冕御大安殿受尊號册寶禮二十七年三月御大安殿受皇太孫册寶金史世宗紀世宗崩遺詔移梓宮壽安宮章宗詔百官議皆謂當如

遺詔移刺履獨曰非禮也天子七月而葬同軌畢至其
可使 國之臣朝大行于離宮乎上曰朕日夜思之舍
正殿而奠於別宮情有所不忍且於禮未安遂殯於大
安殿 金史本傳

明昌四年九月朔天壽節御大安殿受朝賀 金史章宗

凡受尊號百官習儀於大安殿庭皇太子册立設御座
于大安殿 金史禮志

大定五年六月大安殿楹產芝其色如玉 金史五行志
大安殿基今為酒家壽安樓 金臺集

葛邏祿迺賢詩夢斷朝元閣來尋賣酒樓野花迷輦
路落葉滿宮溝風雨青城暮河山紫塞愁老人頭雪

白扶掖 活幽州 同上

大安殿之東北為東宮 金史志

大定七年七月幸東宮視皇太子疾十月勅有司於東
宮涼樓前增建殿位孟浩諫曰皇太子雖為儲貳宜示
以儉德不當與至尊宮室相侔乃罷之 金史世宗紀
十一月皇太子生日宴群臣於東宮 金史列傳

明昌五年復以隆慶宮為東宮慈訓殿為承華殿承華
殿者皇太子所居之東宮也 金史注
紇石烈執中以皇太子儀仗迎莊獻太子入居東宮 金
史志傳

正北列三門中曰粹英為壽康宮母后所居也 金史志
貞元三年十月皇太后至中都居壽康宮十一月上朝

太后於壽康宮

金史海陵紀

西曰會通門門北曰承明門又北曰昭慶門東曰集禧門尚書省在其外其東西門左右嘉會門也門有二樓大安殿後門之後也其北曰宣明門則常朝後殿門也北曰仁政門內有仁政殿常朝之所也

金史志

由會通門承明門入左嘉會門趨而南至幕次少頃鳴鐘鐘罷衛士山呼百官裏見有曳玉帶者五人先出後知爲東宮親王平章令公也頃之入宣明門次仁政門于隔門上面序立三節自東入拜于大壇上上有一品至七品黑漆黃字牌子蓋其朝序也一壇可容數百人遍地製成龍鳳殿九楹前設露臺柱以文繡兩廊各三間中有鐘鼓樓廊外垂金漆簾額飾以繡廊之西馬

有鞞紅繡鞍者數匹乃高麗所進殿門外衛士二三百人分兩傍立盡戴金花帽錦袍宣明門外直至外廊皆甲士青緇甲居左旗執黃龍紅緇甲居右旗執紅龍外廊皆銀槍左掖門入皆金槍人依一柱以立凡門屋下皆青隊執弓矢人數各有差北宮營繕之制初雖取則東都終殫土木之費无悉覆以琉璃役兵民一百二十萬數年方就

北轅錄

入嘉會門至幕次黑布拂廬侍班有頃入宣明門門內庭中列衛士三百許人貼金雙鳳幙頭圍花紅錦衫散手立入至仁政殿下團鳳大花氈可半庭殿兩傍有朶殿朶殿上兩高樓曰東西上閣門兩廡悉有簾幙中有甲士東西御廊循簷各列甲士東立者紅茸甲金纏竿

槍黃旗畫青龍西立者碧茸甲金纏竿槍白旗畫黃龍
至殿下皆然惟立於門下者錦袍持弓矢殿兩階雜列
儀物幢節之屬如道家醮壇威儀之類使人由殿下東
行上東階卻轉南由露臺北行入殿闕謂之欄子金主
幙頭紅袍玉帶坐七寶榻背有龍水大屏風四壁布幕
皆紅繡龍拱斗皆有繡衣兩檻間各有大出香金獅蠻
地鋪禮佛毯可一殿兩傍玉帶金魚或金帶者十四五
人相對列立遙望前後殿屋掘起甚多制度不經工巧
無遺力楊王亮始營此都規摹出於孔彥舟役民八十
萬兵夫四十萬作治數年死者不可勝計金朝北京營
制宮殿其屏展牖皆破汴都輦致於此汴中宮匠有
名燕用者製作精巧凡所造下刻其名及用之於燕而

先兆 攬轡錄

世宗謂宰臣曰宮殿制度苟務華飾必不堅固今仁政
殿遼時所建全無華飾但見他處歲歲修完惟此殿如
舊以此見虛華無實者不能經久也 金史世宗紀

天會四年正月始月丁於乾元殿天眷二年定朔望朝
日儀帝南向拜大定十五年有司上言宜遵古制東向
拜十八年帝拜日于仁政殿始行東向之禮 金史禮志

貞祐元年閏月拜日于仁政殿 金史宣宗紀

泰和殿泰和二年更名慶寧殿 金史

貞元三年十一月宴百官於泰和殿 金史海陵紀

大定二年正月御泰和殿宴百官宗戚命婦 金世宗紀

承安四年五月朔命奏事於泰和殿

金史章宗紀

泰和四年四月張行信召見於泰和殿

金史本傳

魚藻池瑤池殿位貞元元年建有神龍殿又有觀會亭

又有安仁殿隆德殿臨芳殿皇統元年有元和殿

金史

志

泰和三年五月以重五拜天射柳上三發三中四品以

上官侍宴魚藻殿

金史章宗紀

大定二十八年三月朔宣於神龍殿諸王公主以次捧

觴上壽

金史世宗紀

泰和二年八月元妃生皇子忒隣宴五品以上于神龍

殿六品以下宴於東廊

金史后妃傳

光英生日宴百官於神龍殿

金史海陵諸子傳

大定二年宮人稱心等於十六位放火延燒泰和神龍

殿金史列傳

有司乞罷修神龍殿涼位丁役上即日使趙興祥傳詔

罷之金史本傳

金史禮志受尊號儀帝服袞冕御元和殿案此當即遼

之元和殿非魚藻池之元和殿也

北平古今記

常武殿臨武殿為擊毬習射之所

金史志

金因遼舊俗以重五中元重九日行拜天禮重五于鞠

場中元于內殿重九于都城外其制剝木為盤如舟狀

赤為質畫雲鶴文為架高五六尺置盤其上薦食物其

中聚宗族拜之若至尊則於常武殿築臺為拜天所

金

史禮志

大定三年五月以重五幸廣樂園射柳皇太子親王百官皆射勝者賜物有差上復御常武殿賜宴擊球自是歲以為常 金史世宗紀

泰和元年五月擊球于臨武殿八年十一月御臨武殿試護衛 金史章宗紀

正隆元年二月御宣華門觀迎佛 金史海陵紀

承安四年二月御宣華門觀迎佛 金史章宗紀

凡受尊號導引冊寶牀由宣華門入 金史禮志

知近侍局副使徒單張僧遣人召平章已到宣華門外 金史后妃傳

蕭裕執白芩出宣華門 金史本傳

拱辰內城正北門也又曰後朝門制度守衛一與宣華

玉華等金碧翬飛規模宏麗 大金國志

崇慶元年七月有風自東來吹帛一段高數十丈飛動

如龍墜于拱辰門內 金史衛紹王紀

西至玉華門曰同樂園若瑤池蓬瀛柳花杏村盡在于是 大金國志

師拓同樂園詩晴日明華構繁陰蕩綠波蓬丘滄海近春色上林多流水時雖逃遷鶯暖自歌可憐歡樂地鉦鼓散雲和 中州集 歸潛志作并無忌詩

趙秉文同樂園詩春歸空苑不成妍柳影參參水底天過卻清明遊客少晚風吹動釣魚船 滄水集

京城北離宮有大寧宮大定十九年建後更為寧壽又更為壽安明昌二年更為萬寧宮 金史志

明昌六年二月命減萬寧宮陳設九十四所泰和四年
四月萬寧宮端門灾 金史章宗紀

石抹明安攻萬寧宮克之取富昌豐宜二關 元史本傳

大定十九年五月幸大寧宮二十年四月大寧宮火 金史世宗紀

張僅言護作大寧宮引宮左流泉溉田歲獲稻萬斛 金史本傳

瓊林苑有橫翠殿寧德宮西園有瑤光臺又有瓊華島
又有瑤光樓皇統元年有宣和門正隆二年有宣華門
又有撒合門 金史志

郝經瓊華島賦歲癸丑夏經入於燕五月初吉由萬
寧故宮登瓊華島徜徉延佇臨風肆矚想見大定之

治與有百年之盛慨然有懷乃作賦焉其辭曰
栝矢飛燕遼傾宋奔中夏壯觀萃於金源鬱天居之宏
麗開陸地之海山忽陵飛而阜走見虎踞而龍蟠建
瓠水於河朔浩不知其波瀾沉沉單單旋坤轉乾赤
城紫府幻出塵寰粵惟瓊花之一島突兀乎其間崑
崙之顛海風怒掀劈濤頭而迸落結水面之青蓮巖
巖磬磬僵立孱顏疑如鰲頭冠日觀而卻走偃如鯨
背負月窟而橫高寒 其頂有廣寒殿故云 瑤光樓起
金碧鈎連斷霓飮海頡地頡天華陽九州之塵遼海
百年之蘊烽湧煙填慶雲佳氣郁郁芊芊時屬清平
天下晏然倒淮南之戈而荆楚帖崩統萬之角而安
西安神武不殺而日趨於平泰信誓既結而無事乎

開邊明珠白雉不召而麋至蒲稍騷耳無用而復還
一人高拱於其上無所爲而樂穆清之燕大臣優游
於其下無所爲而興禮樂之盛萬物鈞化而無間四
海被澤而不偏風俗既厚綱紀日完財不聚而富刑
不用而措政不更張而治士不作聰明而賢民日遷
善而不知其所以然而然疑疑乎魏孝文駸駸乎漢
孝宣宜乎於此龜天下之樂軼邁往而追羲軒收萬
方之瑰詭盡九土之纖妍紆青雲之環珮奏鈞天之
管絃御長風於絕頂訪蓬壺之飛僊開八荒之壽域
正一氣之陶甄躋斯民於仁壽而君臣與焉挈斯民
於遂樂而君臣享焉涵浸醲郁上格於天舒愉粹暢
下達於泉濟濟洋洋殆三十年見始終之全倏九龍

之飛去墮神鼎于羽淵宗沉社債而乃屢遷雖則屢

遷竟不能永其傳功如是德如是不克負荷一舉而

棄捐孰爲之司而使之然涸金源於汴蔡臥一島於

蒼烟悲風射關

謂居庸也

枯石荒殘瓊花樹死太液

池乾游子目之而興嘆故考思之而淚潛蓋餘恩遺

烈膏于骨髓著於肺肝雖死而若生雖亡而若存有

與析津同沛箕尾共騫者雖曰假山而實德山也彼

虐政虐世昏君暴主以萬人之力肆一己之欲刻吾

乾坤穢吾山川雖曰石山而實血山民欲與之俱亡

卒聚而殲旃寧不愧於茲焉

陵川集

史學宮詞寶帶香禱水府仙黃旂綵扇九龍船薰風

十里瓊華島一派歌聲唱采蓮

中州集

西華潭金之太液池也

金臺集

朱瀾宮詞太液芙蓉上下天秋波澹澹白生烟采蓮

宮女分花了笑把蘭篙學刺船

中州集

葛邏祿廼賢詩秋水清無底涼風起綠波錦帆非昨

夢玉樹憶清歌帝子吹笙絕漁郎把釣多磯頭浣紗

女猶恐是宮娥

金臺集

粧臺李妃所築今在昭明觀後苑嘗與章宗露坐上日

二人土上坐妃應聲曰一月日邊明上大悅

金臺集

章宗為李宸妃建梳粧臺于都城東北隅今禁中瓊花

島粧臺本金故物也日為遼蕭后梳粧地

決堯山堂外

紀

章宗元妃李氏師兒大定末以監戶女子入宮是時宮

教張建教官人師兒與諸宮女從之學故事宮教以青

紗隔障蔽內外不得面見有問自障內映紗指字以請

宮教自障外口說教之諸女子中惟師兒易為領解建

不知其誰但識其音聲清亮章宗問建女子誰可教者

建對曰就中音聲清亮者為最章宗以建言求得之宦

者梁道譽師兒才美勸章宗納之章宗好文詞妃性慧

黯能作字知文義尤善伺候顏色迎合意旨遂大愛幸

明昌四年封昭容明年進封淑妃已進封元妃

金史后

妃傳

葛邏祿廼賢粧臺詩廢苑鶯花盡荒臺燕麥生韶華

如逝水粉黛憶傾城野菊金鈿小秋潭玉鏡清誰憐
舊時月曾向日邊明 金臺集

按粧臺相傳俱云遼蕭后遺跡易之太金不遠其謂李元妃所築可正其譌

大定元年十二月至中都御貞元殿受群臣朝二年四月宴夏使貞元殿 金史世宗紀

自此以後即無貞元殿之稱或以海陵年號為嫌而改之也 北平古今記

承安元年七月天壽節御紫宸殿受賀 金史章宗紀

大定八年十月進幣宴百官于慶和殿 金史列傳

二十五年十月朔宰相以下朝見世宗于慶和殿 金史

顯宗紀

十一月立皇太孫賜六品以上宴於慶和殿 金史列傳

大定二十六年皇曾孫生滿三月宴于慶和殿賜曾孫

金鼎金香合重綵二十端骨觀犀吐鶻玉山子兔兒垂頭一副名馬二匹章宗進玉雙馳鎮紙玉琵琶撥玉鳳鈎骨觀犀具佩刀衣服一襲世宗御酒歡歌乙夜方罷 同上

二十八年十二月上不豫詔皇太孫璟攝政居慶和殿 東廡 金史世宗紀

泰和二年十二月御慶和殿浴皇子 金史后妃傳

七年正月詔御史大夫崇誦等十有四人同對于慶和殿 金史章宗紀

召僕散揆赴闕戒以師期宴于慶和殿 金史本傳

宴內族襄於慶和殿上親舉酒飲解所服玉貝佩刀以賜金史本傳

太和七年正月詔百官同對於廣仁殿金史章宗紀

大定二年閏月神龍殿十六位焚延及太和厚德殿金史五行志

大定十四年四月上御垂拱殿金史世宗紀

路鐸召對於崇政殿金史本傳

世宗召皇太子諸王侍食于清輝殿金史太祖諸子傳

完顏守道懇求致仕特賜宴于慶春殿金史本傳

完顏匡朝京師賜宴于天香殿金史本傳

承安二年六月詔罷瑤完殿工作金史章宗紀

大定二十五年十一月宰相入見于香閣既退徒單克

寧請屠左右奏立皇太孫金史本傳

承安四年三月戶部尚書孫鐸郎中李仲畧國子祭酒

趙帆始轉對香閣金史章宗紀

泰和三年十月右丞僕散揆至自北邊丙辰召至香閣

慰勞之同上

八年以吏部尚書賈益謙等十三員分路同本路按察

司官一員推排民戶物力上召至香閣親諭之金史食

貨志

大定二十九年正月名皇太后宮曰仁壽二月更名隆

慶宮金史章宗紀

正隆六年六月大風毀承天門賜尾金史五行志

大軍發大砲擊碎西承天門樓大金國志

受尊號儀恭謝祖廟還御宣和門金史禮志

貞元三年登寶昌門觀角觝金史海陵紀

海陵登寶昌門樓殺昭媛察八金史后妃傳

海陵御寶昌門臨軒觀試金史列傳

中都圍急詔于東華門置招賢所內外士庶皆得言事

金史列傳

紇石烈執中命聚薪焚東華門金史本傳

大安三年十二月大軍攻南順門完顏天驥設拒馬于

南柳街縱其入以槩禦之且縱火燒兩行民屋街狹屋

倒大軍死傷甚衆大金國志

至寧元年八月胡沙虎殺知大興府徒單南平刑部侍

郎徒單沒撚于廣陽門西金史衛紹王紀

徒單南平行至廣陽門西寓義坊馬上與紇石烈執中

相見執中手槍刺殺之金史本傳

大安三年二月大風從西北來發屋拔木吹清夷門關

折金史五行志

崇慶元年大軍至城下一城中乏薪拆絳綃殿翠霄殿

瓊華閣林木分給四城大金國志

大定十三年四月上御睿思殿命歌者歌女直詞顧謂

皇太子諸王曰朕思先朝所行之事未嘗暫忘故時聽

此詞亦欲令汝輩知之金史世宗紀

海陵登瑞雲樓納涼命楊伯雄賦詩金史本傳

道陵中秋賞月瑞光樓召趙胤文孺對御賦詩以清字

為韻胤詩云秋氣平分月正明藥珠宮闕對蓬瀛已驅

急雨銷殘暑不遣微雲點太清簾外輕風飄桂子夜深
涼露滴金莖聖朝不奏霓裳曲四海歌謳卽樂聲道陵
讀至落句大加賞異手酌金鍾以賜且字之曰文孺以
此鍾賜汝作酒直士林榮之

中州集

承安三年春國主幸蓬萊院陳玉器及諸玩好視其欵
識多宣和物惻然動色宸妃進曰作者未必用用者未
必作宣和作此以爲陛下用耳宸妃嘗與主同輦過御
龍橋見石白如雪愛之歸白國主于蘇山輦至築巖洞
于芳華閣用工二萬人牛馬七百乘道路相望會是冬
賞菊于果明園見屏間畫宣和良嶽問內侍余琬對曰
宣和帝運東南花石築良嶽致亡其國先帝命圖之以
爲戒宸妃怒曰宣和之亡不緣此石乃用童貫梁師成

故爾蓋譏琬也宸妃鄭氏南宋華原郡王居中之曾孫

大金國志

帝詣蓬萊殿觀音祠燒香過浮碧池望池南有二狐相
攜而行逐之各登樹而走內侍言近日此物甚多有戲
舞于宣華殿階之上者帝拊髀曰怪變如此不去可乎

金國南遷錄

大定七年建社稷壇于中都社爲制其外四周爲垣南
向開一神門門三間內又四周爲垣東西南北各開一
神門門三間各列二十四戟四隅連飾梁楹無屋於中
稍南爲壇位令三方廣濶一級四陛以五色土各飾其
方中央覆以黃土其廣五丈高五尺其主用白石下廣
二尺刻其上形如鐘埋其半壇南栽粟以表之近西爲

稷壇如社壇之制而無石主四墼門各五間兩塾三門
門列十二戟墼有角樓樓之面皆隨方色飾之饌幔四
楹在北墼門西北向神厨在西墼門外南向解在南圍
墻內東西向有望祭堂三楹在其北兩則于是堂望拜
堂之南北各爲屋二楹三獻及司徒致齋幕次也堂下
南北相向有齋舍二十楹外門止一間不施鴟尾祭用
春秋二仲月上戊日金史禮志
天德四年於燕京所建原廟名其宮曰衍慶殿曰聖武
門曰崇聖同上
大定十四年十月詔圖畫功臣二十八人于衍慶宮聖
武殿左右廡十七年正月詔于衍慶宮聖武殿西建世
祖神御殿東建太宗睿宗神御殿同上

禮官率太庙署官寺詣崇聖閣奉世祖御容太宗御
容于聖武殿行礼畢以次奉安于丕承殿睿宗御容奉
安于天慶殿同上
大定二十一年閏月昭祖景祖奉安燕昌閣上肅宗穆
宗康宗奉安閣下明肅皇帝奉安崇聖閣下同上
泰和七年五月幸東園射柳金史章宗紀
顯宗殯于南園熙春殿世宗至自上京未入國門先至
熙春殿致奠金史顯宗紀
明昌三年三月幸熙春園金史章宗紀
南苑有唐舊碑書貞元十年御史大夫刘頔葬上見之
曰苑中不宜有墓以刘頔家本怍後詔賜頔錢三百貫
改葬之金史本傳

明昌元年三月擊毬於西苑五月拜天子西苑射柳擊毬金史章宗紀

承安二年三月幸西園閱軍器同上

明昌五年四月朔幸北苑同上

六年十二月幸後園閱軍器同上

大定三年五月以重五幸廣樂園射柳金史世宗紀

大定二十三年正月廣樂園燈山焚延及熙春殿金史

五行志

泰和二年正月幸芳苑觀燈金史章宗紀

承安元年六月幸環秀亭觀稼二年閏月出西橫門觀

稼同上

大興有建春宮金史地理志

承安元年二月幸都南行宮春水三年正月如城南春

水各行宮曰建春四年如建春宮上諭點檢司曰自蒲

河至長河及細河以東朕常所經行官為和買其地命

百姓畊之仍免其租稅金史章宗紀

石沫明安駐軍于京南建春宮元史本傳

燕賓館燕山城外館也石湖集

范成大燕賓館詩九日朝天種落歡也將佳節勸杯

盤苦寒不似東籬下雪滿西山把菊看同上

大定四年十月命都門外夾道重行植柳各百里金史

地理志

章宗宮中絕句五雲金碧拱朝霞樓閣崢嶸帝子家

三十六宮簾盡捲東風無處不楊花歸潛志

日下舊聞卷三終

日下舊聞卷三補遺

宮室一

大定十年燕羣臣于同樂園之瑤池語及古印王成敗之跡大率以不嗜殺人為本數年休兵民力稍蘇獨貪殘之吏去行朝稍遠恐為百姓蠹宜時加稽察知中書省李誥烈稽首曰陛下言及此社稷之福也大金國志大定十六年春正月國主御正隆殿受印寶一曰承天休延萬億永無極二曰受命于天既受永昌三曰天子之寶四曰天子行寶五曰天子信寶六曰皇帝之寶七曰天子神寶八曰御書之寶九曰皇帝恭膺天命之寶十曰天下同文之寶置符寶郎隸門下省大朝會則陳之同上

遼之正殿曰洪武元之正殿曰大明後之國號年號先見于此誰謂非定數也

春明夢餘錄

昆冊謹按遼以大安名殿而金以之紀年亦

兆之先見者

宋淳熙中范至能使北孝宗令口奏金主謂河南乃宋朝陵寢所在願歸侵地宰相力以為未可至能遂自為一書述聖語至金庭納之袖中既退進國書伏地不起時金主乃葛王也嘗寬慈傳宣問使人何故不起至能徐出袖中書矣曰臣來時大宋皇帝別有聖旨難載國書令臣口奏臣今謹以書述書既上殿中觀者皆失色至能猶伏地再傳宣曰書辭已見使人可就館至能再拜而退金之羣臣或不平議羈留使人而金主不可至

能將回又奏曰口奏之事乞於國書中明報仍先宣示庶使臣不墮欺罔之罪金主許之報書云口奏之說殊駭觀聽事須審處那乃孚休既還上嘉其不辱命由是超擢至于大員至能在燕京會同館守吏微言有羈留之議乃賦詩曰萬里孤臣致命秋此身何止一浮漚提攜漢節同生死休問羝羊解乳不

鶴林玉露

燕京城內地大半入宮禁百姓絕少其宮闕壯麗延亘阡陌上切霄漢雖秦阿房漢建章不過如是予奉使至燕山朝見之日見金主儀衛華整過於中國其御榻以七寶為飾夾坐有狻猊二高丈餘金主亮面黧黑目下視長鬣於貞元殿見其狀

海陵集

淳熙十五年二月遣留禮信使顏師魯高震至燕京燕

賓館晏畢入來寧館蓋汎使之館也

思陵錄

宋人與遼金南北通問各設國信使使至俱置客省司四方館使引進有官押燕有伴其後使事不一於卽位上尊號生辰正旦則遣使賀於國恤則遣使告哀弔慰祭奠進遺留禮物又有告慶諭成報聘報謝報論祈請申請詳問等目大半多用詞臣北有燕賓館南有班荆館至燕京則許游燭忠慶壽諸刹至臨安則伴使偕往天竺燒香次冷泉亭呼猿洞而歸當時紀行之書存於今者王曾上契丹事富弼奉使錄許亢宗奉使行程錄洪皓松漠紀聞范成大攬轡錄周輝北轅錄僅寥寥數卷而已其宮闕制度猶可藉以攷證外如路振乘軺錄宋敏求入蕃錄范鎮使北錄劉敞使北語錄江德藻聘

北道里記沈括使遼圖抄李罕使遼見聞錄寇瑊奉使錄王曙戴斗奉使錄王晉使範連鵬舉宣和使金錄何靖奉使雜錄雍堯佐隆興奉使審議錄張棣講和事迹韓元吉金國生辰語錄姚憲乾道奉行錄余爍使燕錄樓鑰北行日錄富軾奉使語錄多軼不傳又若趙良嗣燕雲奉使錄馬擴茆齋自敘沈琯南歸錄鄭望之靖康奉使錄李若水山西軍前奉使錄傅雱建炎通問錄范仲熊北紀晁公恣金人敗盟記雖散見于北盟會編而未必全至若皇華錄南北歡盟錄南北對鏡圖南北國信記議盟記接伴語錄北朝國信語錄賀正人使例使北錄靖康要盟錄紹興通和錄講和錄開禧通和持書通問本末諸書僅畱其目并作者姓氏皆佚矣

瀛洲過

正元四年金主亮率文武百官幸燕遂以燕為中都府
曰大興定京邑焉都城之門十二每一面分三門一正
兩偏其正門四旁又皆設兩門正門常不開惟車駕出
入餘悉由旁兩門焉其門十二各有標名東曰宣耀曰
施仁曰陽春西曰灝華曰麗澤曰新益南曰豐宜曰景
風曰端禮北曰通元曰會城曰崇智內城門左掖右掖
宣陽又在外焉外墨書粉地內則金書朱地皆故禮部
尚書王兢書

金圖經

亮欲都燕遣工寫京師宮室制度濶狹修短盡以塿
之左相張浩輩按圖修之城之四圍九里三十步自天
津橋之門北曰宣陽門門分三中繪一龍兩偏繪一鳳

用金鍍銅實之中門常不開惟車駕出入兩邊分雙隻
日開兩樓曰文曰武自文轉東曰來寧館自武轉西曰
會同館二館皆為本朝使設也正北曰干步廊東西對
兩廊之半各有偏門向東曰太廟向西曰尚書省通天
門觀高八丈朱門五飾以金釘東西相去里餘又設一
門左曰左掖右曰右掖南城之正東曰宣華正西曰玉
華北曰拱辰門內殿凡九重殿三十有六門閣倍之正
中位曰皇帝正位後曰皇后正位位之東曰內省西曰
十六位乃妃嬪所居之地也西出玉華門為同樂園瑤
池蓬瀛杏林盡在是

同上

金本無宗廟不修祭祀自平遼後所用執政大臣多漢
人往往說天子之孝在尊祖尊祖在建宗廟金主方開

悟遂築室于內之東南隅廟貌雖具制極簡畧迨亮徙燕乃築巨闕于南城之南千步廊之東曰太廟標名曰衍慶之宮同上

使至燕京寓于來遠驛泛使則居寧遠驛焉建炎以來朝野雜記

壽寧宮有瓊華島絕頂廣寒殿近為黃冠輩所毀遺山樂

元好問出都作漢宮詞動伯鸞歌事去英雄可奈何但見解稜上金爵豈知荆棘臥銅駝神仙不到秋風客富貴空悲春夢婆行過盧溝重迴首鳳城平日五云多歷歷興亡敗局碁登臨疑夢復疑非斷霞落日天無盡老樹遺臺八更悲滄海忽驚龍穴露廣寒猶

想鳳笙歸從教盡剗瓊華了畱住西山儘淚垂同上

遼主得其臣所獻黃菊賦題其後云昨日得卿黃菊賦細剪金英題作句袖中猶覺有餘香冷落西風吹不去元張有繼孟鑿括其辭寄蝶戀花曰昨日得卿黃菊賦細剪金英題作多情句冷落西風吹不去袖中猶有餘香度滄海塵生秋日暮玉砌雕闌木葉鳴疎雨江愁白頭心更苦素琴猶寫幽蘭譜繼孟手書于卷予嘗見之蘇軾詞話

天眷元年析津放第于廣陽門西一僧寺門上唱名至遷都後命宣陽門上唱名後為定例士學嘉話

王暉燕城書事都會盤盤控北陲當年宮闕五雲飛崢嶸寶氣沉箕尾慘愴陰風貯朔威審勢有人觀督

亢封章無地論王畿荒寒照破龍山月依舊中原半
落暉 秋澗集

又西苑懷古和劉懷州韻彩鳳簫聲徹曉聞宮墻烟
柳接龍津月邊橫吹非清夜鏡裏瓊華總好春行殿
基存焦作土踏錐舞歇草畱茵野花豈解興亡恨猶
學宮粧一色勻 同上

又同劉懷州過西園懷古作錦摛西苑正隆修大定
明昌事讌遊海露恩波鰲抃首花翻瑤艷雪迷樓三
千歌舞繁華歇一片風烟慘愴愁興廢算來無五紀
至今靈沼詠西周 同上

劉景融西園懷古詩瓊苑韶華自昔聞杜鵑聲裏過
天津殿空魚藻山猶碧水澗龍池草自春民樂尚歌

身後曲弓彎不見多時茵絳桃誰植宮墻外露濕州
脂恨未勻 秋澗集附錄

昆田謹按四詩皆有感金故宫而作

端平甲午九月初一日抵燕京守將布吾刺拔都出迎
館人使于王楫宅堂重九日宴人使女樂俳優畢集十
二日同王楫謁宣聖廟卽是金密院因就看亾金宮室
瓦礫填塞荆棘成林 使蒙日錄

劉秉忠游瓊華島江城子詞瓊華昔日賀新成與蒼
生樂昇平西望長山東顧限滄溟翠輦不來人換世
天上月自虛盈 樹分殘照水邊明雨初晴氣還清
暮卻興亾惟有酒多情收取晉人腮上淚千載後幾
新亭 藏春詩集

